

七

國

攷

一







攷 國 七
(一)

撰 說 董

欽定四庫全書提要

七國攷十四卷明董說撰說有易發已著錄是編載秦齊楚趙韓魏燕七國制度分職官食貨都邑宮室國名羣禮音樂器服雜祀喪制兵制刑法災異瑣徵十四門皆採掇諸書以相佐證略如會要之體大致以戰國策史記爲本而以諸子雜史補其遺缺其所援引如劉向列仙傳張華感應類從志子華子符子王嘉拾遺記之類或文士之寓言或小說之雜記皆據爲典要而月令所載太尉大酋之屬注者明曰秦官乃反遺漏未免去取不倫又旣以七國爲名自應始自分晉以後而秦之寺人上引車駢楚之兩廣遠徵左傳則於斷限有乖新

序載魏王欲爲中天之臺許瑄諫止未必實有其事卽有之亦議而未行而魏官室門中乃出一中天臺莊子載無盛鶴列於麗譙蓋城闕之通名非魏所獨有乃於魏宮室中標一目曰麗譙琴操載韓殺聶政之父乃古來之常制非韓所創乃於韓刑法中標一目曰殺亦嫌於苟盈卷帙至於秦水心劍事本見續齊諧記乃云白帖秦舍晉侯於靈臺本見左傳乃云列女傳亦往往不得其出典觀其前後無序跋而齊職官門注封君后妃附乃祇有封君而無后妃殆說未成之稿偶爲後人傳錄歟然春秋以前之制度有經傳可稽秦漢以下之故事有史志可考惟七雄雲擾策士縱橫中間一二百年

典章制作實蕩然不可復徵說能參考諸書排比鈎貫
尙一一各得其崖略俾考古者有徵焉雖間傷蕪漫固
不妨過而存之矣

七國攷卷一

四庫全書原本

守山閣叢書 史部

明董說撰

金山錢熙祚錫之校

秦職官

封君后
妃附

相

國策衛鞅亡入秦孝公以爲相史記惠文王十年張儀相秦
更元七年樂池相秦案禮諸侯有上大夫卿下大夫上士中
士下士凡五等諸侯之大夫不世爵祿公國孤一人大國三
卿皆命于其君次國三卿二卿命于天子一卿命于其君小
國三卿一卿命于天子二卿命于其君每國下大夫五人上
士二十七人大國之卿不過三命下卿再命小國之卿與大
夫一命次國之上卿位當大國之中中當其下下當其上大

夫小國之上卿位當大國之下卿中當其上大夫下當其下大夫至于周衰諸侯失制號令自己其名不一正卿當國皆謂之相楚謂之相亦謂之令尹荀子曰孫叔敖曰吾三相而心愈卑淮南子曰蘧伯玉爲相又子產爲鄭國相孔子攝行魯相事公儀休爲魯相戰國又不可勝數矣

左右丞相

史記秦武王二年初置丞相樛里疾甘茂爲左右丞相茂爲左疾爲右莊襄王又以呂不韋爲丞相按物原云諸臣稱丞自秦獻公置丞相始是獻公之時已置丞相武王特加左右之名耳杜氏通典曰丞相相國皆秦官金印紫綬掌丞天子助理萬幾曰丞相荀悅曰秦本次國命卿止二人是以置左

右丞相無三公官漢官儀云相國丞相皆六國時官余按二世已誅李斯乃拜趙高爲中丞相是二世時又有中丞相矣

相國

杜預曰始皇始置相國余按范曄傳秦昭王加賜相國應侯食物日益厚是昭王時有相國又莊襄王元年東周君與諸侯謀秦秦使相國呂不韋誅之見秦紀

師

商君傳太子犯法衛鞅曰法之不行自上犯之將法太子太子君嗣也不可施刑刑其傅公子虔黥其師公孫賈

傅

詳見師

上卿

國策秦王大說姚賈封千戶以爲上卿又秦封甘羅爲上卿

亞卿

晉公子雍仕秦爲亞卿見左傳

客卿

史記昭襄王三十六年客卿竈攻齊取剛壽

上大夫

虞氏春秋秦繆公贖百里奚于楚欲爵之百里奚曰臣不及臣之友臣之友曰蹇叔是察於王道於是繆公使人厚幣迎蹇叔以爲上大夫

右大夫

左傳楚子囊乞旅於秦秦右大夫詹帥師從楚子又秦右大夫說

中大夫令

史記秦始皇九年中大夫令齊等二十人皆梟首正義曰中大夫令秦官也齊名也

五校大夫

秦昭王使五校大夫王陵將而伐趙見國策

將軍

穰侯傳昭王以冉爲將軍

護軍將軍

漢書百官公卿表云護軍將軍從秦官舍人李斯爲之漢表

無此

文

國尉

白起傳白起遷爲國尉正義曰言太尉通鑑秦尉錯伐魏襄城注尉國尉也月令云立夏命太尉贊桀俊注太尉秦官按尙書中候舜爲堯太尉故徐陵碑云舜爲太尉於是九澤載疏禹作司空然後百川咸導

廷尉

李斯傳秦王除逐客之令復李斯官卒用其計謀官至廷尉二十餘年竟并天下據此秦并天下以前有廷尉

都尉

通鑑秦始皇二十二年楚大敗李信入兩壁殺七都尉注此

郡都尉將兵從伐楚者也又秦使都尉墨等從石牛道伐蜀

中尉

華陽國志蜀王伐苴侯苴侯奔巴求救於秦秦惠王方欲謀
楚羣臣議曰夫蜀西僻之國戎狄爲鄰不如伐楚司馬錯中
尉田真黃曰蜀有桀紂之亂其國富饒得其布帛金銀足給
軍用水通于楚有巴之勁卒浮大船舶以東向楚楚地可得
軍尉

也
應劭漢書注云秦惠文王置軍尉又國策有尉注有尉軍尉

衛尉

史記秦始皇九年衛尉竭內史肆佐弋竭中大夫令齊等二

十人皆梟首漢書百官表曰衛尉秦官

秩史

史記秦襄公十三年初有秩史以紀事

御史

劉歆七略云戰國秦趙皆立御史又秦御史見廉頗藺相如傳按周禮有御史掌邦國都鄙及萬民之治令以贊冢宰凡治者受法令焉掌贊書

內史

史記戎王使由余於秦繆公退而問內史廖漢書百官表云內史周官又應侯謂昭王曰其令邑中自斗食以上至尉內史有非相國之人者乎注尉內史秦二官名

長史

李斯傳秦王拜斯爲長史

大良造

史記惠文王五年陰晉人犀首爲大良造昭襄王十五年大良造白起攻魏國策右行秦謂大良造注秦官也以良作梁庶長

史記惠文王更元七年韓趙魏燕齊帥匈奴共攻秦秦使庶長疾與戰修魚虜其將申差余按秦爵二十等有左庶長右庶長此庶長當別是一官如有五大夫官大夫又有大夫也左傳秦庶長鮑庶長武帥師伐晉以救鄭又亢倉子秦景主將眎強兵於天下使庶長鮑庶長武帥師侵晉余按春秋時

有秦景公卽景主也蓋秦在春秋時卽有庶長之官

太守

風俗通秦昭王使李冰爲蜀郡太守史記昭襄王十三年任
鄙爲漢中守漢書百官表云郡守秦官

縣官

史記秦王收穰侯之印使歸陶因使縣官給車牛以從玉海
云周官有縣正春秋時縣大而郡小縣邑之長曰宰曰尹曰
公曰大夫其職一也戰國郡大而縣小矣故甘茂謂秦武王
曰宜陽大縣名曰縣其實郡也

令

商君傳秦集小都鄉邑聚爲縣置令丞

丞

詳見令

常侍郎

物原云諸官稱郎自秦武王置常侍郎始李斯傳李斯求爲
呂不韋舍人不韋賢之任以爲郎

郎中

國策段產謂新城君曰今臣處郎中能無議君於王不能使
人無議臣於君荆軻傳秦有郎中又韓非子秦惠王愛公孫
衍郎中皆曰兵秋起攻韓犀首爲將於是日也郎中盡知之
執法

國策秦自四境之內執法以下執法殿中法官

謁者

史記秦昭王使謁者王稽於魏漢明帝詔曰昔燕太子使荆軻劫始皇變起兩檻之間其後謁者持匕首劍刺腋高祖偃武行文故易之以板

中車府令

蒙恬傳趙高昆弟數人皆生隱宮其母被刑僂世世卑賤秦王聞高強力通於獄法舉以爲中車府令傳言秦王知未并天下之前也

右行

國策石行秦謂大梁造曰欲決伯王之名不如備兩周辨智之士注云石行一作右行右行秦官也

佐弋

詳見衛尉漢書百官表曰秦時少府有佐弋漢武帝改爲佽
飛掌射弋者

主簿

風俗通曰秦昭王時蜀守李冰與江神鬪主簿刺殺江神按
玉海云主簿漢晉有之不言秦官應麟失攷也

主魚吏

劉向列仙傳赤須子豐人也豐中傳世見之云秦繆公時主
魚吏也

里正

韓非子秦昭王有病百姓里出一牛而家爲禱王嘗其里正

與伍老屯二甲里正者司鄉邑者也

主鐵官

司馬遷傳司馬靳孫昌爲秦主鐵官按楊升庵外集紀秦官
名有工官鹽官鐵官銅官錦官服官羞官尊官渴官林官疇
官湖官陂官樓船官發弩官均輸官橘官苑官滙浦官皆秦
官名而漢因之雜見於諸傳百官表不悉載者微乎微者也
余意秦并天下之後所置故鐵官外不具錄

市官

華陽國志張儀與張若城成都置鹽鐵市官并長丞

寺人

秦風未見君子寺人之令鄭箋云欲見國君者先令寺人使

傳告之時秦仲又始有此官傳云寺人內小臣也正義曰天官序官云內小臣奄上士四人寺人王之正內五人則天子之官內小臣與寺人別官也燕禮諸侯之禮也經云獻左右正與內小臣是諸侯之官有寺人也

著人

秦別紀云繆公享國三十九年天子致伯葬雍繆公學著人索隱曰著音貯又音宁著卽宁也門屏之間曰宁謂學於宁屏門之人故詩云俟我於著乎而楊慎曰三代之君必學於耆德以爲師保而繆公乃學於宁人以刑餘爲周召以法律爲詩書又不待始皇胡亥矣則景監得以薦商鞅趙高得以殺扶蘇終於亡秦著人之禍也

侍醫

史記荆軻逐秦王而卒惶急無以擊軻而以手共搏之是時侍醫夏無且以其所奉藥囊提荆軻也

掌卜

左傳秦伯伐晉卜徒父筮之吉杜預曰徒父秦之掌龜卜者

大祝

集仙傳注蕭史爲秦大祝

宗祝

秦詛楚文云又秦嗣王敢用吉玉瑄璧使其宗祝邵馨布愍告於不顯大沉久湫按周禮有大祝小祝器祝詛祝宗祝疑詛祝之類也

舍人

史記始皇初卽位李斯爲舍人注主廡內小吏名或曰侍從
賓客謂之舍人也

行人

道書注秦昭王時行人張固至楚按左傳文公十二年秦行
人夜戒晉師

中庶子

中庶子蒙嘉秦王寵臣見刺客傳

少庶子

國策甘羅爲文信侯少庶子蓋家臣也

徹侯十二

商君爲秦制爵二十等以賞功勞徹侯二十關內侯十九大庶長十八駟車庶長十七大上造十六少上造十五右更十四中更十三左更十二右庶長十一左庶長十五大夫九公乘八公大夫七官大夫六大夫五不更四簪褭三上造二公士一詳應劭漢儀後漢志云徹侯金印紫綬功大者食縣小者食鄉亭得臣其所食吏民後避漢武帝諱改曰通侯或曰列侯

關內侯

九十

顏師古曰言有侯號而居京畿無國邑也荀綽百官表註曰時六國未平將相皆居關中故以爲號按呂覽春秋齊景公時已有關內侯又嬾真子云僕仕於關中嘗見一方寸古印

印文云關外侯印然疑古有關內侯不聞有關外侯後於魏志見之建安二十三年始置名位侯十二級以賞軍功關外侯乃其一也

大庶長八十

劉昭曰自左庶長以上至大庶長卽將軍也所將庶人更卒故以爲大庶長卽大將軍也左右庶長卽左右偏裨也

駟車庶長七十

言乘駟馬之前而爲衆庶之長

大上造六十

大上造少上造言皆主上造之士

少上造五十

詳上

右更十四

言主領更卒部其役事

中更三十

昭襄王三十八年中更胡傷攻闕與

左更二十

昭襄王時有左更白起及左更錯

右庶長十一

言爲衆列之長

左庶長十

孝公拜鞅爲左庶長秦舊有此官

五大夫九

五大夫大夫之尊者也劉昭曰自公士至大夫皆軍吏也昭襄王十三年五大夫禮出亡奔四十五年五大夫賁攻韓取十城葉陽四十八年五大夫陵攻趙邯鄲至始皇封松爲五大夫

公乘

八

言得乘公家之車也傅子云臨戰得乘公車故曰公乘

公大夫

七

漢舊儀云公大夫領行伍兵漢書高帝紀曰其七大夫以上皆令食邑師古注云七大夫公大夫也爵第七故謂之七大夫

官大夫^六

官大夫亦謂之國大夫

大夫^五

傅子云大夫者在車右也左傳楚人滅江秦伯爲之降服出次不舉過數大夫諫又穀梁疏云秦無大夫秦處西戎罕接諸夏繆公始有大夫

不更^四

不更者言不預更率之事漢舊儀云不更主一車四馬秦桓公時已有不更女父見左傳

簪裏^三

以組帶馬曰裏簪裏者言飭此馬傅子云駕車馬者其形如

簪故曰簪裹

上造二

造成也言有成命於上

公士一

言有爵命異於士卒 史記始皇四年百姓內粟千石拜爵

一級按納粟拜爵始此

商君以下附

史記孝公以衛鞅爲相封之於商號曰商君竹書紀年云周顯王二十八年秦封衛鞅於鄔改名曰尙胡應麟曰史無封尙之文尙恐商字之誤

涇陽君

范雎曰太后擅行不顧穰侯出使不報涇陽華陽擊斷無諱
昭襄王同母弟二曰顯高陵君也曰悝涇陽君也

華陽君 新城君

宣太后二弟冉同母芊戎異母芊戎封爲華陽君又號新城
君國策注云新城君芊戎也

高陵君

詳見涇陽君

嚴君

史記昭襄王元年嚴君疾爲相正義曰蓋封蜀郡嚴道縣因
號嚴君疾樛里子名也

武安君

昭襄王十三年左更白起攻新城十四年左更白起攻韓魏於伊闕十五年大良造白起攻魏二十七年白起攻趙二十八年大良造白起攻楚楚王走周君來白起爲武安君

長安君

始皇弟長安君將兵擊趙在始皇八年見漢書五行志

安國君

昭襄王四十二年安國君爲太子

陽泉君

呂不韋見秦質異人奇之爲說秦王后弟陽泉君以上並見史記王符曰戰國之制將相權臣必以親家皇后兄弟主婿外孫年雖童妙未脫桎梏由籍此官職功不加民澤不被下

而取侯多受茅土又不得治民効能以報百姓虛受重祿素餐尸位而但事滛侈坐作驕奢破敗而不及傳世者也子產有言未能操刀而使之割其傷實多信哉

昌平君

史記嫪毐爲亂王使昌平君昌文君發卒攻毐

昌文君

詳見昌平君

武信君

秦惠王封儀五邑號曰武信君見傳

剛成君

國策文信侯欲攻趙以廣河間使剛成君蔡澤事燕蔡澤傳

云號爲綱成君與國策異余按戰國封君有二一以封地爲號如秦之華陽涇陽新城陽泉齊之安平楚之彭城襄城魏之平都中山之類是也一特立名號如秦之剛成武信齊之孟嘗楚之春申

春申傳注云四君封邑檢皆不獲唯平原有地又非趙境並蓋號謚而孟嘗是諡然余按

孟嘗亦非諡乃號耳

趙之馬服信平武襄長安之類是也

南鄭公

北史李氏之先出自帝顓頊高陽氏周時李耳字伯陽爲柱下史子孫散居諸國或在趙或在秦在秦者名與族爲將軍生子伯佑建功北狄封南鄭公

穰侯

昭王時封魏冉於穰復益封陶號曰穰侯見穰侯傳

蜀侯

華陽國志秦惠王封子通爲蜀侯七年復封子惲爲蜀侯十五年封惲子綰爲蜀侯

應侯

史記范雎封爲應侯秦王謂范雎曰昔者齊桓公得管仲時以爲父今吾得子亦以爲父

文信侯

異人旣以不韋計得立以不韋爲相號曰文信侯食藍田十二縣

長信侯

秦封嫪毐爲長信侯上並見史記 右封君

王后 夫人 美人 良人 八子 七子 長使
少使

應劭云秦自惠文王後嫡稱王后次稱夫人又有美人良人八子七子長使少使之號美人爵視二千石比少上造八子視千石比中更史記昭襄王母芊八子是也 右后妃爵秩

田齊職官

封君后妃附

相

國策鄒忌爲齊相

司馬

齊王建入朝于秦雍門司馬前諫見國策余按齊桓公時置王子成爲大司馬景公以穰苴爲司馬蓋春秋列國皆置司

馬也

師

通鑑孫臏以刑徒陰見說齊使者齊使者竊載與之齊田忌善而客待之進於威王威王問兵法遂以爲師

傅

呂氏春秋齊宣王使淳于髡傅太子

太傅

國策齊逐孟嘗君梁使三反孟嘗君固辭不往王聞之遣太傅齎黃金千斤文車二駟服劍一封書謝孟嘗君注太傅本周官當是齊之大臣

御史

史記齊威王置酒後宮問淳于髡曰先生能飲幾何而醉對曰賜酒大王之前執法在前御史在後髡恐懼不過一斗徑醉矣按戰國並置御史

太史

史記淳齒弑閔王於鼓里太子法章乃解衣免服逃去爲太史家灌園太史后氏女知其貴人也善事之注后姓也太史官名以其姓后不可曰后后故曰君王后也左傳疏云天子則內史主之外史佐之諸侯亦不異但春秋之時不能依禮諸侯史官多有廢闕或不置內史其策命之事多是大史

右師

王驩爲齊右師見孟子余按趙有左師古人吉禮尙左唯喪

禮軍禮尙右左陽右陰故喪禮右也人左臂力少右臂力多故軍禮右也秦漢及元代制度丞相將軍以下官俱先右而後左秦於金石文及本紀稱右丞相去疾左丞相斯可證

士師

劉向孟子注士師田齊獄官余按先齊景公時有士師見晏子春秋

祭酒

荀卿三爲齊祭酒見劉向目錄按史記注云三爲祭酒者謂荀卿出入前後三度處列大夫康莊之位而皆爲其所尊故云三爲祭酒漢書注應劭云禮飲酒必祭示有先也故稱祭酒尊之也如淳云祭祠時唯尊長者以酒沃酬

· 博士

五經異義曰戰國時齊置博士之官班固亦云六國時往往有博士掌通古今

卿

孟子爲卿於齊淳于髡曰夫子在三卿之中

上卿

說苑淳于髡立爲上卿

客卿

蘇秦傳蘇秦佯爲得罪於燕而亡走齊齊王以爲客卿

大夫

冊府元龜魯謂之宰仲尼爲中都宰是也齊謂之大夫齊威

王封卽墨大夫烹阿大夫是也

上大夫

齊宣王喜文學游說之士如騶衍淳于髡之徒七十六人皆賜列第爲上大夫見史記劉向荀子目錄曰方齊威王之時聚天下賢士于稷下尊寵之若鄒衍田駢淳于髡之屬甚衆號曰列大夫咸作書刺世是時荀卿年十五始來游學至齊襄王時荀卿最爲老師齊尙修列大夫之缺余按列大夫卽賜列第爲上大夫也或曰齊有上大夫又有列大夫非

中大夫

韓子云齊中大夫有夷射者

上將軍

說苑田單爲齊上將軍史記作將軍

駙駕

韓子造父爲齊王駙駕

執法

詳見御史

掌書

呂氏春秋春子諫大室宣王召掌書曰書之蓋史官也劉向作召尙書書之于寶周禮注曰言司者總其柄言師者訓其徒言職者主其業言衡者平其政言掌者主其事言氏者世其官言人者終其身

郎中

韓子齊威王時有郎中

諸侯主客

滑稽傳齊王罷長夜之飲以髡爲諸侯主客正義曰今鴻臚卿也按周禮有掌四方賓客主卽掌也

謁者

國策先生王斗造門欲見齊宣王宣王使謁者延入注謁者掌賓讚受事延引也

五官

靖郭君謂齊王曰五官之計不可不日聽也而數覽見國策鮑昭曰曲禮司徒司馬司空司士司寇典司五衆計其事之凡也正曰按記曾子問諸侯出命國家五官而后行高曰五

官齊之計簿書者或作五大夫非也按楚亦有五官

守

山東志盼子戰國時人齊威王使守高唐趙人不敢東漁于河

令

雜事篇云齊田單爲卽墨令

靖郭君

以下附

國策靖郭君將城薛舊注田嬰諡正曰此據史文索隱曰靖郭當是封邑之號漢齊王舅父駟鈞封靖郭侯也按戰國臣死無諡索隱爲是耳靖郭君又名薛公

孟嘗君

見國策田嬰子田文也

安平君

貂勃惡田單曰安平君小人也注安平在青州臨淄縣東單初起安平故以爲號

成侯

成侯鄒忌爲齊相高誘注成齊邑按田齊世家鄒忌子以鼓琴見威王三月而受相印居朞年封以下邳號曰成侯則成侯爲號矣

楚職官

附封君

令尹

史記郝敖三年以其季父康王弟圍爲令尹考烈王以左徒

爲令尹封於吳號春申君應劭曰令尹楚相也陳軫所謂國冠之上又國策陳軫曰令尹貴矣王非置兩令尹也以此見楚令尹爵位最高傅遜氏曰春秋諸國惟楚英賢最多而爲令尹執國政者皆其公族少有僨事旋卽誅死所以強大累世而威略無下移固其君之強明亦其傳國用人之制獨善也

小令尹

國策爲公仲謂向壽曰今公與楚解中封小令尹以桂陽一作杜陽

柱國

史記懷王六年楚使柱國昭陽將兵攻魏

上柱國

國策楚國之法破軍殺將者其官爲上柱國封上爵執珪又上柱國子良入見通典云柱國上柱國皆楚之寵官宛委餘編云上柱國楚爲勳官在令尹下諸卿上其後隋爲從一品階官在唐則爲四品以後階官皆不甚尊

相國

國策周共太子死有五庶子皆愛之而無適立也司馬翦謂楚王曰何不封公子咎而爲之請太子左成謂司馬翦曰周君不聽是公之智困而交絕於周也不如謂周君曰孰欲立也微告翦翦令楚王資之以地公若欲爲太子因令人謂相國御展子唐夫空曰王類欲令若爲之此健士也居中不便

於相國相國令之爲太子注相國楚官楚有相國柱國又楚
置相璽

將軍

史記楚成王三十九年伐宋宋告急於晉晉救宋成王罷歸
將軍子玉請戰楚共王十六年共王召將軍子反

上將軍

說苑田忌去齊奔楚楚郊迎至舍問曰楚萬乘之國也齊亦
萬乘之國也常欲相并爲之奈何對曰易知耳齊使申繻將
則楚發五萬人使上將軍將之至禽將首而反耳

大將軍

史記楚懷王十七年秦大敗我軍斬甲士八萬虜我大將軍

屈匄裨將軍逢侯丑等七十餘人

裨將軍

詳上

太宰

左傳楚靈王卽位遠罷爲令尹遠敗疆爲太宰先是伯州犁爲太宰被殺

少宰

左宣十二年楚少宰如音師注少宰官名

太師

史記穆王以其太子宮子濬崇使爲太師掌國事

少師

說苑楚莊王之時太子車立於茅門之內少師慶逐之太子怒入謁王曰少師逐臣之車王曰舍之老君在前而不踰少君在後而不豫是國之寶臣也

太子太傅

史記平王時伍奢爲太子太傅无忌爲少傅

左專作奢爲太子建師費無極

師爲少

荀綽晉百官表曰太子太傅唐虞官

太子少傅

詳上

保

楚文王不治政保申諫曰先王卜以臣爲保吉云云見呂氏春秋又楚語鍾儀曰其爲太子也師保奉之以朝於嬰齊而

夕於側也

司馬

史記楚靈王十二年吳越兵立子比爲王公子子哲爲令尹
棄疾爲司馬

大司馬

國策遣昭常爲大司馬令往守東地又左傳公子圍殺大司
馬蔣掩而取其室申無宇曰王子必不免善人國之主也王
子相楚國將善是封殖而虐之是禍國也且司馬令尹之偏
而王之四體也

右司馬

左傳楚公子申爲右司馬

左司馬

韓詩外傳楚使申鳴爲左司馬又國策齊韓魏其伐燕燕使太子請救於楚楚使景陽將而擊之暮舍使左右司馬各營壁地又左傳載楚子田孟諸宋公爲右孟鄭伯爲左孟期思公復遂爲右司馬子朱及文子無畏爲左司馬

司徒

左傳楚令尹蔣艾獵城沂使封人慮事以授司徒量功命日

司敗

左傳子西曰臣免於死又有讒言謂臣將逃請歸死於司敗也杜預云陳楚名司寇爲司敗

司官

左傳楚子朝其大夫曰晉吾仇敵也苟得志焉無恤其他今其來者上卿大夫若吾以韓起爲闡以羊舌肸爲司官足以辱晉我亦得志矣注司官謂加官刑使爲司官之官也

莫敖

左傳有莫敖屈瑕注莫敖楚官名又國策威王問於莫敖子華自從先君文王以至不穀之身亦有不爲爵勸不爲祿勉以憂社稷者乎按楚改司空爲莫敖

新造蓋

國策芴冒勃蘇曰臣非異楚使者新造蓋鮑昭曰楚官余案戰國官號之奇者如新造蓋犀首是也姓名之奇者如董之繁菁及昔成帝是也

大夫

登徒子好色賦大夫登徒子侍于楚王又懷王時上官大夫按穀梁傳云楚無大夫疏云無大夫凡有三等之例曹無大夫者本非微國後削小耳莒則是東夷本微國也楚則蠻夷之國僭號稱王其卿不命於天子故不得同中國之例也册府元龜云楚命大夫爲公余意楚公尹之外又有大夫之官但列國大夫皆尊爵楚不過備官耳

上大夫

齊桓公七子奔楚楚以爲上大夫見史記

五大夫

呂氏春秋荆文王曰莫喜數犯我以義違我以禮與處則不

安曠之而不穀得焉不以吾身爵之後世有聖人將以非不穀於是爵之五大夫

三閭大夫

離騷注屈原名平與楚同姓仕於懷王爲三閭大夫三閭之職掌王族三姓曰昭屈景屈原序其譜屬率其賢良以厲國士入則與王圖議政事決定嫌疑出則監羣下應對諸侯按戰國策楚有昭奚恤元和姓纂云楚武王子食采於屈因氏焉屈重屈蕩屈平屈建並其後又云景氏有景差至漢皆徒關中

公

杜預曰楚僭號縣令皆稱公葉公諸梁申公鬲班之類是也

冊府元龜云魯謂之宰齊謂之大夫楚謂之尹亦謂之公公爵在侯伯之上楚僭天子之號故命大夫爲公也又銅龍志云鄭公渾者乃楚之鄭鄉守邑大夫僭稱公故世以爲鄭公渾耳漢書孟康注云楚舊僭稱王其縣宰爲公陳涉爲楚王沛公起應涉故從楚制稱曰公

卿

楚武王子瑕受屈爲卿因以爲氏見離騷注

上卿

譙周二巴記云周末巴國有亂巴國將軍晏子請師於楚許以三城楚王與師晏子既平巴國旣而楚遣使請城晏子曰吾城許予之君矣持頭往謝楚王城不可得乃自刎以頭與

楚王楚王曰吾得臣若巴曼子何以城爲乃以上卿禮葬曼子頭

執珪

文選注楚爵功臣賜以圭謂之執圭比附庸國策注楚國之法破軍殺將其官爲上柱國封上爵執珪者謂旣爲上柱國之官又虛受執珪之爵也余按上柱國執珪皆楚官名封上爵執珪卽今尙書加官保之比文選注未明國策楚嘗與秦搏難戰於漢中通侯執珪死者七十餘人注通侯執珪皆楚官又楚襄王以執珪授莊辛淮南子云伏非爵爲執珪又云子發攻蔡踰之宣王郊迎列田百頃而封之執珪又云吳起爲楚滅爵祿之令而功臣畔矣徐注滅爵滅執珪之類

通侯

詳見執珪

三旌

莊子楚昭王延屠羊說以三旌之位法三旌三公位也司馬本作三珪謂諸侯之三卿皆執珪者韓詩外傳作昭王請屠羊說爲三公一官爾或稱三公或稱三旌或稱三珪也宋玉招魂三珪重侯聽類神只王逸云三珪謂公侯伯也

五官

國策楚昭王反郢五官失法蒙穀獻典五官得法劉歆云楚之五官者五卿也或云如秦五大夫一人官之者也

太史

張華感應類從志云有蒼雲圍軫軫楚之分野是不善之徵
楚太史唐勒乃夜以葭灰遺於地乃更滅拂之其蒼雲爲之
半滅春秋文耀鉤作唐舉詳見災異攷

左史

國語左史倚相王應麟玉海云左史楚之史官也韓詩外傳
楚史援筆而書之於策

左徒

史記頃襄王二十七年使左徒侍太子於秦考烈王立以左
徒爲令尹封於吳蓋黃歇初爲左徒官也又屈原爲懷王左
徒正義曰蓋今左右拾遺之類

右領

左傳子穀曰右領差車與左史老皆相令尹司馬以伐陳注
右領官名

令

史記楚以荀卿爲蘭陵令又辛尹文爲江南令見春秋翼

典令

國策史疾謂楚王曰今王之國有柱國令尹司馬典令其任
官置吏必曰廉潔勝任今盜賊公行而弗能禁也此烏不爲
烏鵲不爲鵲也

市令

史記莊王以爲幣輕更以小爲大百姓不悅市令言之相
言之王

市長

真仙通鑑云宋來子楚莊公時市長

尹

左傳楚武王克權使鬬緡尹之以叛圍而殺之遷權於郟處使鬬敖尹之

亞尹

亢倉子荆君熊圍問水旱理亂亢倉子曰水旱由天理亂由人若人事和理雖有水旱無能爲害堯湯是也故周之秩官云人強勝天若人事壞亂縱無水旱日益崩離且桀紂之滅豈惟水旱荆君北面遵循稽首曰天不棄不殺及此言也乃以和璧十朋爲亢倉子壽拜爲亞尹曰庶吾國有瘳乎

王尹

左傳楚莠尹然王尹麇帥師救潛孔穎達疏曰楚官多以尹爲名知二尹是官名耳其莠王之義不可知也服虔曰王尹主宮內之政余按今本王作工然楚自有工尹此當是王尹也

右尹

史記靈王聞太子祿之死自投於車下曰人之愛子亦如是乎侍者曰甚是王曰余殺人之子多矣能無及此乎右尹曰請待於郊以聽國人又左傳有右尹子辛右尹子革通志世族略有右尹氏

左尹

左傳楚左尹卻宛工尹壽帥師至於潛吳師不能退通志有左尹氏云楚左尹卻宛之後項羽本紀云楚左尹項伯者項羽季父也蓋仍楚舊又廣陵人召平矯陳王命拜項梁爲楚王上柱國懷王以呂青爲令尹

工尹

見上又左傳工尹路請曰君王命剝圭以爲鍼秘敢請命主入視之析父謂子革吾子楚國之望也今與王言如響國其若之何檀弓有工尹商陽注工尹楚官名

寢尹

左傳注柏舉之役寢尹由于以背受戈

莠尹

左傳楚蒍尹然王尹麇帥師救潛杜預曰二尹楚官然麇其名通志作季尹

藍尹

通志氏族略云藍尹氏楚大夫藍尹亶之後也楚書云藍尹陵尹分掌山澤位在朝廷

監馬尹

劉向云楚有監馬尹宮廐尹楚有監馬尹大心

宮廐尹

詳上左傳公子圍弑王宮廐尹子皙出奔鄭

中廐尹

左傳楚卻宛之難國言未已進胙者莫不謗令尹沈尹戍言

於子常曰夫左尹與中廐尹莫知其罪而子殺之以興謗讟
杜預曰左尹卻宛也中廐尹陽令終

芊尹

史記靈王飢不能起芊尹申無宇之子申亥曰吾父再好王
命王弗誅恩孰大焉乃求王奉之以歸

環列之尹

左傳楚穆王立以其爲太子之室與潘崇使爲太師且掌環
列之尹注環列之尹宮衛之官

清尹

通志楚有清尹弗忌清尹楚官號也

陵尹

通志氏族略陵尹氏楚大夫陵尹喜陵尹招之後陵尹楚官

箴尹

左傳有箴尹克黃玉海云楚有箴尹之官又楚有鍼尹固見定公四年箴一作鍼

連尹

左傳楚公子午爲令尹公子罷戎爲右尹蔣子馮爲大司馬公子橐師爲右司馬公子成爲左司馬屈到爲莫敖公子追舒爲箴尹屈蕩爲連尹養由基爲宮廐尹以靖國人君子謂楚於是乎能官人又楚連尹襄老

縣尹

左傳穿封戌囚皇頡公子圍與之爭之正於伯州犁伯州犁

曰請問於囚乃立囚伯州犁曰所爭君子也其何不知上其
手曰夫子爲王子圍寡君之貴介弟也下其手曰此子爲穿
封戌方城外之縣尹也誰獲子

囂尹

左傳楚子狩於州來次於潁尾使蕩侯潘子司馬督囂尹午
陵尹喜帥師圍徐以懼吳

郊尹

左傳楚子奔成然邑而使爲郊尹許氏說文曰邑外謂之郊
郊外謂之野野外謂之林林外謂之坵

玉尹

新序荆人卞和奉玉璞而獻之楚武王武王使玉尹相之玉

尹掌玉之官也

卜尹

史記楚平王謂觀從恣爾所欲欲爲卜尹王許之賈逵曰卜尹卜師大夫官故卜尹亦曰卜大夫也

樂尹

左傳楚子入於郢將嫁季芊季芊辭曰所以爲女子遠大夫也鍾建負我矣以妻鍾建以爲樂尹楚子昭王也樂尹樂大夫也

門尹

左傳石乞尹門注爲楚門尹也

樂師

左傳鄭文夫人芊氏姜氏勞楚子於柯澤楚子使師縉示之
俘馘杜預曰師縉楚樂師也又楚有樂師扈子作窮劫之曲
見吳越春秋

樂長

焦竑云予得漢延熹中碑云優孟楚之樂長史記所謂樂人
優孟者也

冷人

左傳晉侯觀於軍府見鍾儀問之曰南冠而縶者誰也有司
對曰鄭人所獻楚囚也使稅之召而弔之再拜稽首問其族
曰冷人也注冷人樂官名古冷氏世掌官因以爲號冷音伶
封人

詳見司徒

銷人

史記楚靈王獨徬徨山中野人莫敢入王王行遇其故銷人
韋昭曰今之中銷

工正

左傳薦賈爲工正

軍正

列子魯施氏之子好兵楚王以爲軍正

廷理

韓詩外傳楚昭王有士曰石奢其爲人也公而好直王使爲
廷理說苑楚令尹子文之族有干法者廷理拘之聞其令尹

之族也而釋之子文召廷理而責之曰凡立廷理者將以司犯王命而察觸國法也或作廷尉

郎中

國策朱英謂春申君曰君先仕臣爲郎中君王崩李園入臣請爲君撞其胸殺之

正僕

左傳昭十三年陳蔡入楚蔡公使須務牟與史狎先入因正僕人殺太子祿及公子罷敵注須務牟史狎楚大夫蔡公之黨也正僕太子之近官

謁者

國策蘇秦謂楚王曰謁者難得見如鬼王難得見如帝

闔

詳司宮卽司門之官也職比大閹較卑

大閹

左傳巴人伐楚楚于禦之大敗於津還鬻拳弗納遂伐黃敗黃師於涪陵還及湫有疾夏六月庚申卒鬻拳葬諸夕室亦自殺也而葬於絳皇初鬻拳強諫楚于楚子弗從臨之以兵懼而從之鬻拳曰吾懼君以兵罪莫大焉遂自刎也楚人以爲大閹謂之大伯使其後掌之杜預曰大閹若今城門校尉官

御士

左傳于南之子弃疾爲王御士注云御士御王車者之官也

周亦有御士

太官

史記楚莊王有愛馬衣以文繡置華屋下席以露牀啗以棗脯馬死欲以大夫禮葬之樂人優孟入殿門大哭曰請以君禮葬之以雕玉爲棺文梓爲槨豫章爲題漆發甲卒爲墻老弱負土諸侯聞之皆知大王賤人而貴馬也王曰爲之奈何請爲王言六畜之葬以籠竈爲之槨銅鑿爲之棺齊以薑桂薦以木蘭衣之以火光葬人腹中王乃以馬屬太官無令天下知聞也

銅官

圖書記云楚設銅官鑄錢洲上遂名銅官按一統志銅官渚

也 在湖廣長沙府城北六十里有洲舊傳楚鑄錢處卽銅官洲

太卜

屈原卜居云屈原既放三年不得復見竭智盡忠蔽鄣於讒心煩慮亂不知所從乃往見太卜鄭詹尹曰余有所疑願因先生決之注太卜楚掌卜者之官按周禮有太卜

嗇夫

楚有嗇夫空詳見相國

主酒吏

許慎淮南注楚會諸侯魯趙皆獻酒於楚王主酒吏求酒於趙趙不與吏怒乃以趙厚酒易魯薄者奏之楚王以趙酒薄

遂園邯鄲也

庖宰 監食

賈子云楚惠王食寒菹而得蛭因遂吞之腹有疾而不能食令尹入問曰王安得此疾王曰吾食寒菹而得蛭念譴而不行其罪乎是法廢而威不立也非所聞也譴而行誅則庖宰監食者法皆當死心又不忍也故吾恐蛭之見遂吞之

關吏

吳越春秋子胥到昭關關吏欲執之伍員因詐曰上所以索我者美珠也今我已亡矣將去取之關吏因舍之按周禮有司門司關

堂谿氏以下

史記吳夫概敗奔楚楚封之堂谿號爲堂谿氏或作堂谿公
白公

楚惠王二年于西召故平王太子建之子勝於吳以爲巢大
夫號曰白公服虔曰白邑名楚邑杜預曰汝陰襄信縣西南
有白亭

春申君

考烈王以黃歇爲令尹封於吳號春申君

彭城君

昭奚恤與彭城君議於王前注彭城屬楚以上並見史記

襄城君

說苑有襄城君

鄂君

楚辭後語越人歌者楚王之弟鄂君泛舟於新波之中榜枻
越人擁棹而歌

鄢陵君 壽陵君

國策莊辛謂楚襄王曰君王左州侯右夏侯輦從鄢陵君與
壽陵君

安陵君

江乙說於安陵君注云失其姓蓋楚之幸臣

陽陵君

莊辛說襄王襄王聞之顏色變作身體戰慄於是乃以執珪
授之爲陽陵君與淮北之地

臨武君

天下合從趙使魏加見楚春申君曰君有將乎曰有之僕欲將臨武君魏加曰臨武君嘗爲秦孽不可爲拒秦之將也以上並見國策

陽文君

史記黃歇爲楚太子計曰陽文君子二人在中王若卒大命太子不在陽文君子必立爲後太子不得奉宗廟矣不如亾秦

州侯 夏侯

詳見鄢陵君

陵陽侯

荆王封卞和爲陵陽侯見謝詩注

趙職官

附封君

丞相

國策希寫見建信君建信君曰秦使人來仕僕官之丞相五大夫注秦武王二年初置丞相秦爵五大夫第九據此則趙亦有之戰國改置遞相效也按魏亦有丞相見魏職官

相國

趙武靈王傳國於少子何肥義爲相國見趙世家應劭曰相國之名始此秦漢因之又趙惠文王以相國印授樂毅

假相國

廉頗傳趙以尉文封廉頗爲信平君爲假相國又趙世家孝

成王十七年假相大將武襄君攻燕注假相假名相也余按
項羽斬宋義頭自立爲假上將軍韓信破齊遣使立爲假王
其端有自起

守相

國策文信侯出走與司空馬之趙趙以爲守相注守假官也

代相

見後官帥將

柱國

翟章從梁來甚善趙王王三延之以相不受田駟謂柱國韓
向曰臣請爲君刺之注云柱國楚官蓋趙亦有

左師

國策左師觸龍願見太后注春秋之時宋有左右師上卿也
趙以觸龍爲左師冗散之官以優老臣齊有右師王驩

師

史記趙烈侯好音將賜歌者田萬畝相國公仲連乃進牛畜
荀欣徐越牛畜侍烈侯以仁義約以王道荀欣選練舉賢徐
越節財儉用烈侯悅使使謂相國曰歌者之田且止官牛畜
爲師荀欣爲中尉徐越爲內史或曰師卽右師之官也

傅

國策武靈王二十五年使周紹爲王子傅

司寇

公子成爲相號安平君李兌爲司寇見史記胡三省云司寇

周六卿之一也

左司馬

張孟談告趙襄子曰左司馬見使於國家安社稷不避死以
成其忠注左司馬張孟談自謂也見國策余按趙必有左右
司馬

上卿

韓詩外傳趙以孫子爲上卿史記趙惠文王十六年廉頗爲
趙將伐齊大破之取晉陽拜爲上卿藺相如傳趙王以相如
功大拜爲上卿位在廉頗之右

王劭按董勛荅禮曰職高者
名錄在上於人爲右職卑者
名錄在下

於人爲左

客卿

春秋後語東里子趙之客卿也

大夫

史記趙武靈王立何爲王大夫悉爲臣

上大夫

相如旣歸趙王以爲賢大夫使不辱於諸侯拜相如爲上大夫見史記

中大夫

韓非子王登爲中牟令上言於襄主曰中牟有士曰中章胥已者其身甚修其學甚博君何不舉之主曰子見之我將爲中大夫按左傳晉有中大夫

五大夫

詳見丞相

夢大夫

占夢書引趙史記云趙簡子病五日不知人扁鵲視之曰不出三日必寤寤必有言也居二日半簡子寤語大夫曰我之帝所甚樂與百神游於鈞天廣樂九奏萬舞不類三代之樂其聲動人心有一熊一羆來欲援我帝命我射之死帝賜我二笥皆有副吾見兒在帝側帝屬我一翟犬曰及而子之壯也以賜之夢大夫董安于受言而書藏之於府按趙世家無夢大夫三字

國尉

史記趙以許歷爲國尉

都尉

新序秦趙戰於長平趙不勝亡一都尉應劭曰自上安下曰尉武官悉以爲稱胡三省通鑑注曰戰國之時有國尉有都尉

中尉

詳見師

尉文

史記孝成王十五年以尉文封相國廉頗爲信平君注尉文官名謂以尉文所食之地以封廉頗也或作邑名又作尉官文名俱非是

將軍

史記幽繆王七年秦人攻趙趙大將李牧將軍司馬尙擊之

大將軍

文選注李牧爲趙大將軍又史記云趙王與大將軍廉頗諸大臣謀按左傳晉閻沒女寬謂魏獻子曰豈將軍食之而有不足又家語衛將軍文子問於子貢自戰國置大將軍周末又置前後左右將軍

官帥將

漢書馮奉世傳馮奉世字子明上黨潞人也徙杜陵其先馮亭爲韓上黨守秦攻上黨絕太行道韓不能守馮亭乃入上黨城守於趙趙封馮亭爲華陽君與趙將括拒秦戰死於長平宗族繇是分散或留潞或在趙在趙者爲官帥將官帥將

子爲代相師古曰帥音所類反字或作師

中候

趙奢傳軍中候有一人言急救武安趙奢立斬之

內史

詳見師漢書百官表云少府內史周官秦因之掌治京師

御史

張儀說趙王曰敝邑秦王使臣獻書於大王御史應劭曰御史立於陛下者猶云陛下舊注御史周宗伯屬官秦因之趙亦有此官補曰御史周官以中士下士爲之特小臣之傳命者余按廉頗藺相如傳相如顧趙御史曰某年某月趙王使秦王鼓缶是又紀事之官矣

尹史

趙有尹史見月生齒齟畢大星占有兵變詳見災異攷

筮史

史記孝成王夢乘飛龍上天不至而墜明日召筮史敢占之
注筮史官敢名也周禮有筮人古筮字

代史

竹書紀年慎覲王十三年邯鄲命將軍大夫適子代史皆貂
服代史不知何官姑附於此

郎中

國策秦召春申君因而留之泄鈞謂文信侯曰春平侯者趙
王甚愛之而郎中妬之應劭曰郎中趙官名

中庶子

詩傳曰扁鵲過趙趙王太子暴疾而死鵲造宮門曰吾聞國中卒有壤土之事得毋有急乎中庶子之好言方者應之曰然王太子暴疾而死按扁鵲傳作號太子不審孰是姑存之

行人

國策馮忌請見趙王行人見之注行人趙官又趙簡子時有行人燭過見韓非子

宰人

莊子說劍云宰人上食王三環之王者趙文王也又史記趙襄子請代王使厨人操銅斗以食代王及從者行斟陰令宰人各以斗擊殺代王注宰人趙之卑官余按宰人卽周庖人

之類

令

詳見中大夫

家令

古今注云羅敷爲邑人千乘王氏妻王氏後爲趙王家令家令疑官名

宦者令

杜氏通典云天文有宦者四星在帝座之西周官有宦正官伯官人內宰閹人寺人戰國時有宦者令注云趙有宦者令繆賢是也

博聞師

史記武靈王少未能聽政立博聞師三人左右司過二人應劭曰博聞師趙諫官余按司過乃諫官耳博聞師當是備顧問者

司過

詳見博聞師按湯有司直之臣周禮有司諫中士二人史二人徒二十人

司日

劉向錄云趙武靈王立司日出納王命余按國語趙簡子田于嬖史黜聞之以犬待于門簡子見之曰何爲曰有所得犬欲試之茲囿簡子曰何爲不告對曰君行臣不從不順主將適嬖而黜不聞臣敢煩當日注當日簡子當日之官武靈司

日疑卽此官也

太卜

國策趙取周之祭地周君患之告於鄭朝鄭朝曰君勿患也臣請以三十金復取之周君子之鄭朝獻之趙太卜因告以祭地事及王病使卜之太卜譴之曰周之祭地爲祟趙乃還之

典門

子華子云子華子逢趙趙簡子不悅燭過典廣門之左簡子召而語之以其故余按古有典門之官呂氏春秋又云趙簡子時陽城胥渠處廣門之官

黑衣

國策左師觸龍曰老臣賤息舒祺最少不肖而臣衰竊愛憐之願得補黑衣之缺以衛王宮注黑衣衛士之服也沈約史記注云黑衣趙官名戰國時官制紛亂如魏之犀首齊之祭酒皆緣事起名不仍周舊趙衛宮之官衣黑衣遂名黑衣也

驂乘

少室周爲趙襄王驂乘見孟子注

筆吏

呂覽章句趙簡子以周舍爲筆吏

津吏

列女傳趙簡子南擊荆至河津津吏醉卧不能渡

傳舍吏

春秋後語秦急圍邯鄲邯鄲且欲降傳舍吏子李同說平原君曰今邯鄲之民析骨而炊易子而食可謂急矣而君之後宮以百數婢妾被綺縠餘梁肉而民敝衣不完糟糠不厭君器物鐘鼓自若使秦破趙安得而有此哉

田部吏

史記趙奢者趙之田部吏也收租稅而平原君家不肯出趙奢以法治之

奉陽君

以下附

蘇秦說趙肅侯曰奉陽君妬大王不得任事注肅侯令其弟成相號奉陽君

安陽君

惠文王四年朝羣臣安陽君亦來朝

平陽君

惠文王二十七年封趙豹爲平陽君

華陽君

白起傳趙封馮亭爲華陽君

武陽君

孝成王十一年武陽君鄭安平死徐廣曰故秦將降趙也

武襄君

孝成王十六年以樂乘爲武襄君正義曰襄舉也上也言樂
乘功最高也

武安君

幽繆王三年秦政攻赤麗宜安李牧率師與戰肥下却之封
牧爲武安君又蘇秦傳趙封蘇秦爲武安君以上見史記

建信君

國策建信君貴於趙或謂建信君君之所以事王者色也建
信君無攷

平都君

國策趙惠文王三十年相平都君田單謂趙奢曰吾非不悅
將軍之兵也

廬陵君

馮忌爲廬陵君謂趙王曰廬陵君孝成王母弟見趙記
代成君

趙世家襄子平代遂以封伯魯子周爲代成君

長安君

趙世家孝成王三年王新立太后用事秦急攻之趙氏求救於齊齊曰必以長安君爲質正義曰長安君者以長安善故名也

信平君

史記孝成王十五年以尉文封相國廉頗爲信平君正義曰信平廉頗號也言篤信而廉平也

馬服君

惠文王二十九年趙使趙奢將擊秦大破秦軍闕與下賜號爲馬服君見史記說在趙兵制中崔浩云馬服趙官名誤陳餘遺章

邯書曰白起爲秦將南征鄢郢北阬馬服注奢子括代號馬服

望諸君

樂毅傳毅知燕惠王之不善畏誅遂西奔趙趙封樂毅於觀津號曰望諸君

平原君

平原君趙勝見國策

春平君

悼襄王時秦召春平君泄鈞爲之說文信侯注春平君趙太子也

李侯

平原傳秦圍邯鄲急傳舍吏子李談說平原君得敢死士三千人與赴秦軍秦兵遂罷李同戰死趙封其父爲李侯徐廣曰河內成臯有李城正義曰懷州溫縣本李城李同父所封

魏職官

附封君

丞相

史記蘇代曰太子自相三人者皆以太子爲非常相也皆務以國事魏欲得丞相璽也注魏置丞相余按太子自相亦奇

師

通鑑魏文侯以下子夏田子方爲師虞夏商皆有師保疑丞師古官也

傳

史記翟璜曰君之子無傅臣進屈侯鮒胡三省云傅者傅之以德義因以爲官名

司徒

芒卯謂秦王曰王能使臣爲魏之司徒則臣能使魏獻長平王屋洛林之地也見國策按左傳晉以僖侯廢司徒注僖侯名司徒故廢司徒爲中軍魏有司徒知三晉之官非晉舊也

犀首

春秋後語魏以犀首官公孫衍劉向別錄云犀首大梁官名公孫衍嘗爲是官因號犀首蓋以官號也司馬彪曰犀首魏官若今虎牙將軍

將軍

魏有將軍王敖見劉向孟子注

上將軍

國策迎孟嘗君爲上將軍魏世家令太子申爲上將軍信陵君傳魏王以上將軍印授公子

客將軍

國策秦圍趙之邯鄲魏安釐王使將軍晉鄙救趙畏秦止於蕩陰不進魏王使客將軍辛垣衍間入邯鄲應劭曰魏有客將軍官

五乘將軍

韓子秦韓攻魏昭卯西說而秦韓罷齊荆攻魏昭卯東說而齊荆罷魏襄王養之以五乘將軍卯曰伯夷以將軍葬於首

陽山下而天下曰夫以伯夷之賢與其稱仁而以將軍葬是手足不掩也按將軍周末官此言伯夷以將軍葬無攷注五乘將軍謂養之以五乘爲將軍也余謂注非也當是五乘之將軍古者兵車一乘甲士三人步卒七十二人五乘凡三百七十五人

公乘

說苑魏文侯時有公乘不仁公乘疑官名晉有公乘之官是也

大夫

孔叢子秦兵攻趙魏大夫以爲於魏便國策魏武侯與諸大夫泮於西河

上大夫

尹文子魏王賜獻玉者千金長食上大夫之祿

中大夫

史記魏人范雎從中大夫須賈使於齊注戰國之時仍周制置上中下三大夫隋書百官志曰周監二代沿革不同其道既文置官彌廣逮於戰國戎馬交馳雖時有變革然猶仍周制

國大夫

韓非子吳起下令大夫曰明日且攻亭有能先登者仕之國大夫賜之上田宅呂氏春秋云吳起治西河欲諭其信於民夜日置表於南門之外令於邑中曰明日有人僨南門之表

者仕長大夫明日日晏矣莫有僨表者民相謂曰此必不信
有一人曰試往僨表來謁吳起吳起自見而出仕之長大夫
異文而同實也

五大夫

國策信陵君使人謂安陵君曰君其遣縮高吾將仕之以五
大夫使爲持節尉或作執節尉呂氏云謂兼持節尉也

關內侯

爲竇屢謂魏王曰王不若與竇屢關內侯見國策

上卿

新序魏文侯召翟黃入復爲上卿

持節尉

詳見五大夫注持節尉尉之持節者按周禮有掌節

御史

國策安邑之御史死注六國已遣御史監郡不自秦始皇也

守

魏文侯問於解狐曰寡人將置西河之守見說苑又吳起爲

西河守

令

西門豹爲鄴令見淮南子

樂人

桓譚新論云漢文帝得魏文侯時樂人竇公百八十歲文帝
奇之問何服食而至此對曰年十三失明父母教以鼓琴日

以爲常無所服餌

虞人

魏文侯與虞人期獵見國策注虞人掌山澤之官按周禮有山虞澤虞

舍人

說苑魏文侯封太子擊於中山三年使不往來舍人趙倉奉使

御庶子

國策魏公叔痤病惠王往問之曰公叔病卽不可諱將柰社稷何痤對曰痤有御庶子公孫鞅願王以國事聽之也史記作中庶子注云此公族官別於國官及太子官或以爲御庶

子痤之家臣如甘羅爲文信侯少庶子也白帖作公叔之少子誤矣禮記曰古者周天子有庶子之官職諸侯卿大夫之庶子掌其戒令與其教理別其等正其位胡三省曰自戰國以來大夫之家有中庶子舍人青絲編曰中庶子魏官時公叔痤相魏中庶子其屬官也故曰痤有中庶子公孫鞅

博士

漢書賈山傳賈山潁川人也祖父祛故魏王時博士弟子也師古曰六國時魏也

主書

呂氏春秋魏攻中山樂羊將已得中山還反報文侯有貴功之色文侯知之命主書曰羣臣賓客所獻書者操以進之主

書舉兩篋以進令將軍視之

信安君以下

國策秦召魏相信安君注史不書無攷

平都君

長平之役平都君說魏王

隱陵君

詳見宮室攷

安陵君

國策信陵君使人謂安陵君按征羌侯國有安陵亭

信陵君

信陵君殺晉鄙救邯鄲破秦人存魏國見史記曹子建七啟

云若夫田文無忌之儔乃上古之俊公子也皆飛仁揚義騰躍道藝游心無方抗志雲際揮袂則九野生風慷慨則氣盛虹蜺

甯陵君

魏豹傳魏豹者故魏諸公子也其兄魏咎故魏時封爲甯陵君秦滅魏遷咎爲家

中山君

魏文侯封擊爲中山君見韓詩外傳及說苑

龍陽君

國策魏王與龍陽君共船而釣胡元瑞筆叢云魏安釐王幸姬號龍陽君見名疑今以爲男子非是余按古來美人諒亦

有稱龍陽者非男子矣婦人封君至隱怪也天下守箋注童而習之不知其非誣女爲男號爲幸臣封君之奇反聳瞽焉譬如晦夜不見星斗獨有雲霧

除甯侯

續春秋云魏龐涓爲除甯侯

韓職官

封君附

相國

國策謂韓相國曰人之善扁鵲者爲有臃腫也史記韓懿侯八年申不害相韓修術行道國內以治諸侯不來侵伐

司空

呂氏春秋韓氏城期十五日而成段喬爲司空有一縣後二

日段喬執其吏而囚之囚者之子走告封人子高曰惟先生能活臣父之死孔安國曰司空主空土以居人按空穴也古者穴居一曰司空地官雖空處皆得司也言自地以上無不司

太守

韓氏上黨守馮亭使者至曰願以上黨人之趙趙使平原君往受地以萬戶都三封其太守爲華陽君以千戶都三封其縣令爲侯見通鑑正義曰爾時未合言太守至漢景帝時始置太守此言太守衍字也余按國策中太守數見正義誤

縣令

詳見太守

封人

詳見司空

客卿

客卿爲韓謂秦王見國策注云韓重客卿位在相國之下一等

大夫

琴經疏聶伯爲韓大夫出使於秦作怨離之曲別老母稚妻也

中庶子

國策韓公叔與幾瑟爭國中庶子強謂太子曰不若及齊師未及急擊公叔

典冠

韓非子韓昭侯醉而寢典冠者見君之寒也故加衣於君之上覺而問左右曰誰加衣者左右對曰典冠君因罪典衣與典冠其罪典衣以爲失其事也其罪典冠以爲越其職也

廩吏

韓子韓昭侯之時廩吏竊黍種

燕職官

封君祿制附

相國

國策秦客卿謂穰侯君欲成之何不使人謂燕相國又韓非子邲人有遺燕相國書史記蘇秦之在燕與其相子之爲婚又燕王喜命相栗腹約歡趙趙世家作燕王令丞相栗腹約

歡

上卿

蘇代說燕昭王王曰吾請拜子爲上卿又太子丹尊荆軻爲上卿並見史記

亞卿

樂毅傳樂毅爲魏昭王使於燕燕王以客禮待之樂毅辭讓遂委質爲臣燕昭王以爲亞卿

大夫

王喜時有大夫將渠詳見兵制攷

太傅

史記燕太子丹質於秦亡歸見秦且滅六國兵已臨易水太

子丹患之謂其太傅鞠武曰燕秦不兩立

將軍

史記燕噲讓位子之國大亂將軍市被與太子平謀將攻子
之

上將軍

典略燕以樂毅爲上將軍

御書

蘇代自齊獻書於燕王曰臣之行也固知有口事故獻御書
而行應劭曰御書猶尙書也余按趙亦有御史蓋謁者之官

右御

韓非子右御冶工見外儲說

境吏

國策張丑爲質於燕燕王欲殺之走且出境境吏得丑

豕宰

符子朔人獻燕昭王以大豕曰養奚若使曰豕也非大豕不居非人便不珍今年百二十矣人謂豕仙王乃命豕宰養之十五年大如沙獮足如不勝其體王異之命衡官橋而量之折橋豕不量又命水官舟而量之其重千斤其巨無用燕相謂王曰奚不享之王乃命宰夫膳之

衡官

詳上按周禮有林衡川衡

水官

詳冢宰

宰夫

詳冢宰周宰夫之職掌治朝之法以正王及三公六卿大夫羣吏之位掌其禁令燕之宰夫乃膳人矣自春秋以來皆然

女伶官

拾遺記燕昭王時廣延國獻善舞者二人容冶妖麗靡於鸞翔而歌聲輕颺迺使女伶代唱其曲余按伶樂官也黃帝時樂師伶倫世掌樂官故後世號樂官曰伶官女伶者女樂官也周禮有女祝女史後代有女尙書女侍中女學士女博士之類又有女將軍女司樂女司樂卽女伶官也

昌國君附

以下

史記樂毅勝齊燕昭王親至濟上勞軍行賞饗士封樂毅於昌國號爲昌國君及樂毅奔趙後燕王復以其子樂閒爲昌國君

奉陽君

國策奉陽君甚不取於蘇秦正義曰奉陽君李兌

成安君

趙世家惠文王二十八年燕將成安君公孫操弑其主 右封君

三百石

史記燕噲自三百石吏以上而效之子之注以石計祿始見於此又秦范雎曰自斗食以上有非相國之人者乎王翦歸

斗食以下秩呂不韋舍人六百石以上奪爵孟子爲齊卿其
祿十萬鍾七國祿制僅見於此姑附燕職官俟博聞者 右
祿制

七國攷卷二

秦食貨

戶籍河渠附

轅田

漢地理志秦孝公用商鞅制轅田開阡陌杜氏通典云孝公用商鞅鞅以三晉地狹人貧秦地廣人寡故草不盡墾地利不盡出於是誘三晉之人利其田地復三代無知兵事務本於內而使秦人應敵於外故廢井田開阡陌任其所耕不限多少數年之間國富兵彊天下無敵吳氏曰井田受之於公毋得粥賣故王制曰田里不粥秦開阡陌遂得買賣又戰得甲首者益田宅五甲首而隸役五家兼并之患自此始矣民田多者以千畝爲畔無復限制王氏曰古者遂廣二尺溝四

尺洫八尺澮二尋則丈有六尺矣徑容車馬畛容大車涂容
乘車一軌道二軌路三軌則幾二丈矣此其水陸占地不得
爲田者頗多所以正經界止侵爭時畜洩備水旱爲永久之
計今商君除一時之害而千古聖賢傳授精微之旨失矣蔡
澤稱商君曰決裂阡陌決裂云者井田之制分畫堅明封表
深固非大用其力以決裂之不能掃滅其跡也陸深傳疑錄
曰商鞅佐秦以一夫力餘地利不盡於是改制二百四十步
爲畝

秦孝十二年
周顯十九年

秦別紀作昭襄王四年初爲田開阡陌

牛田

國策秦以牛田通水糧

墾令

商君開塞耕戰書載墾令曰無宿治則邪官不及爲私利於民而百官之情不相稽則農有餘日邪官不及爲私利於民則農不敝農不敝而有餘日則草必墾矣訾粟而稅訾則上一而民平上一則信信則臣不敢爲邪民平則慎慎則難變上信而官不敢爲邪民慎而難變則下不非上中不苦官下不非上中不苦官則壯民疾農不變壯民疾農不變則少民學之不休少民學之不休則草必墾矣無以外權爵任與官則民不貴學問又不賤農民不貴學則愚愚則無外交無外交則勉農而不偷民不賤農則國安不殆國安不殆勉農而不偷則草必墾矣祿厚而稅多食口衆者敗農者也則以其食口之數賤而重使之則僻滯游食之民無所於食民無所

於食則必農農則草必墾矣使商無得糴農無得糶農無得糶則賦情之農勉疾商不得糴則多歲不加樂多歲不加樂則饑歲無裕利無裕利則商怯商怯則欲農賦情之農勉疾商欲農則草必墾矣聲服無通於百縣則民行作不顧休居不聽休居不聽則氣不溢行作不顧則意必一意一而氣不溢則草必墾矣無得取庸則大夫家長不見繕愛子情民不賦而庸民無所於食是必農大夫家長不見繕則農事不傷愛子情民不賦則故田不荒農事不傷農民益農則草必墾矣庸雇也開民雇役於人也繕治也大夫家長不得役民治事也廢逆旅則姦偽躁心私交疑農之民不行逆旅之民無以食則必農農則草必墾矣壹山澤則惡農慢情倍欲之民無所於食無所於食則必農農

則草必墾矣貴酒肉之價重其租令十倍其樸然則商估少
農不能喜酣爽大臣不能爲荒飽商估少則上不費粟民不
能喜酣爽則農不慢大臣不荒則國事不稽主無過舉上不
費粟民不慢農則草必墾矣重刑而連其罪則褊急之民不
闕恨剛之民不訟怠情之民不游費資之民不作巧諛惡心
之民無變也五民者不生於境內則草必墾矣使民無得擅
從則誅愚亂農無所於食而必農愚心躁欲之民一意則農
民必靜農靜誅愚則草必墾矣均出餘子之使令以世使之
又高其解舍令有甬官食概不可以辟役而大官未可必得
也則餘子不游事人則必農農則草必墾矣國之大臣諸大
夫博聞辯慧游居之事皆無得爲無得居游於百縣則農民

無所聞變見方農民無所聞變見方則知農無從離其故事而愚農不知不好學問愚農不知不好學問則務疾農知農不離其故事則草必墾矣令軍市無有女子而命其商令人自拾甲兵使視軍典又使軍市無得私輸糧者則姦謀無所於伏盜輸糧者不私稽輕情之民不游軍市盜糧者無所售送糧者不私輕情之民不游軍市則農民不搖國粟不勞則草必墾矣百縣之治一形則從迂者不敢更其制過而廢者不能匿其舉過舉不匿則官無邪人迂者不飾代者不更則官屬少而民不勞官無邪則民不敖民不敖則業不敗官屬少徵不煩民不勞則農多日農多日徵不煩業不敗則草必墾矣重關市之賦則農惡商商有疑情之心農惡商商疑情

則草必墾矣以商之口數使商令之慚與徒重者必當名則
農逸而商勞農逸則良田不荒商勞則去來齎送之禮無通
於百縣則農民不饑行不飾農不饑行不飾則公作必疾而
私必荒則農事必勝農事必勝則草必墾矣令送糧無取餽
勿得反庸車牛輿重設必當名然則往來疾則農業不敗農
業不敗則草必墾矣無得爲罪人請於吏而饟食之則姦民
無主姦民無主則爲姦不勉農民不傷姦民無樸姦民無樸
則農民不敗農民不敗則草必墾矣

粟

魏文帝典論當七國爭鬪秦粟如山趙若虎

棗粟

韓子秦大饑應侯請發五苑果棗粟以活民詩疏云粟五方皆有周秦吳揚特饒唯漁陽范陽粟甜美長味他方不及也

載鹽

太平御覽云秦穆公使賈人載鹽

行錢

秦別紀秦惠文王生十九年而立立二十初行錢始皇本紀秦始皇九年令國中有生得嫪毐賜錢百萬殺之五十萬許氏說文云古者貨貝而寶龜周而有泉至秦始皇行錢

租禾

史記秦簡公七年初租禾

賦稅 口賦

史記秦孝公十四年初爲賦董仲舒云秦用商鞅之法力役三十倍於古田租口賦鹽鐵之利二十倍于古日慎齋記聞云秦商鞅更爲稅法收太半之賦三分而稅一咸陽民力殫矣大事記云秦賦戶口百姓賀死而弔生故秦譎曰渭水不洗口賦起卽苛政猛虎之意矣

蠻夷賦

漢舊注云秦惠王以巴氏爲蠻夷君長有罪得以爵除其君長歲出賦二千一十六錢三歲一出義賦千八百錢其民戶出帛布八丈二尺雞羽三十緡杜氏通典云秦昭襄王時巴郡閬中夷廖仲等射殺白虎昭王以其夷人不欲加封乃刻石爲盟要復夷人頃田不租十妻不算注云一戶免其一頃

田之租雖有十妻不輸口算之錢

長太平倉

太平御覽云秦始皇四年七月立長太平倉豐則糴歉則糶以利民也

戶籍

史記秦獻公十年初爲戶籍相伍按杜氏通典云周武王致商之罪罔有敵於我師一戎衣天下大定垂拱而天下治定五代之封凡千七百七十三國又滅湯時千三百國人衆之損亦如之周公相成王致理刑措人口千三百七十萬四千九百二十三此周之極盛也及昭王南征不還穆王荒蕪加以幽厲之亂平王東遷三十餘年莊王十三年齊桓公二年

五千里外非天子之御自太子公侯以下至於庶人凡千百八十四萬一千九百二十三人其後諸侯相并尚有千百國至於戰國存者十餘於是縱橫短長之說相奪於殘人詐力之兵動以萬計伊闕之敗斬首二十四萬長平之戰血流漂鹵周之列國唯秦楚燕而已齊及三晉皆以篡亂衛雖得存不絕如綫然攷蘇張之說秦及山東戍卒尙踰五百餘萬推人口數尙當千餘萬也

李冰渠

揚雄云蜀有李冰渠秦蜀守通華陽國志云孝文王以李冰爲蜀守冰乃壅江作壩穿郫江檢江別支流雙過郡下以行舟船岷山多梓栢大竹頽隨水流坐致材木功省用饒又溉

灌三郡開稻田於是蜀沃野千里號爲陸海旱則引水浸潤
雨則杜塞水門故記曰水旱從人不知饑饉時無荒年天下
謂之天府也外作石犀五頭以厭水精穿石犀溪於江南命
曰犀牛里後轉置犀牛二頭一在府市市橋門今所謂石牛
門是也一在淵中乃自前堰上分穿羊摩江灌江西於玉女
房下自涉郵作三石人立三水中與江神要水竭不至足盛
不沒肩時青衣有沫水出蒙山下伏行地中會江南安觸山
脇溷崖水脈漂疾破害舟船歷代患之氷發卒鑿平溷崖通
正水道氷又通筴通汶井江徑臨邛與蒙溪分水白木江會
武陽天社山下合江又導洛通山洛水或出瀑口徑什邡郫
別江會新都大渡又有綿水出紫岩山徑綿竹入洛東流過

資中會江陽皆溉灌稻田膏潤稼穡是以蜀川人稱郫繁曰膏腴綿洛爲浸沃也又識齊水脈穿廣都鹽井諸陂池蜀於是盛有養生之饒焉又風俗通云秦昭王使李冰爲蜀郡太守開成都兩江溉田萬頃無復水旱之災歲常豐史記云蜀守冰鑿離碓辟沫水之害穿二江成都之中理道要訣云秦以李冰爲蜀郡太守透百丈堰灌田數千頃蜀以富饒

鄭國渠

通鑑始皇元年韓欲疲秦人使無東伐乃使水工鄭國爲間於秦鑿涇水自中山爲渠並北山東注洛中作而覺秦人欲殺之鄭國曰臣爲韓延數年之命然渠成亦秦萬世之利也乃卒使爲之注填淤之水溉烏鹵之地四萬餘頃收皆畝一

鍾關中由是益富饒通典京兆雲陽縣有鄭國渠班志涇水出安定郡涇陽縣西雞頭山東至馮翊陽陵縣入渭過郡三行千六百里師古曰注引也填淤謂壅泥也言引淤濁之水灌鹹鹵之地更令肥美故一畝之收至六斛四斗杜佑曰古者百步爲畝秦漢以降卽二百四十步爲畝唐夷狄傳杜佑謂秦漢鄭渠溉田四萬頃白渠溉田四千五百頃永徽中兩渠灌浸不過萬頃大厯初減至六千頃脔一斛歲少四五百萬斛復兩渠之饒誘農夫趨耕河隴可復

君主妻河

史記秦靈公八年城塹河瀕初以君主妻河索隱曰謂初以此年取他女爲君主猶公主也妻河謂嫁之河伯余按魏俗

亦爲河伯娶婦然民女耳秦乃以君主甚矣魏自西門豹爲
鄴令此俗遂絕秦則靈公以下世世守爲常法史曰初者明
後世不改也

江神聘婦

風俗通云秦昭王伐蜀令李冰爲守江水有神歲取童子二
人爲婦主者出錢百萬以行聘冰曰不須吾自有女到時裝
飾其女當以沉江冰徑上坐舉酒酬曰今得傅九族江君大
神當見尊顏相爲進酒冰先投杯但澹淡不耗厲聲曰江君
將與當相伐耳拔劍忽然不見良久有蒼牛鬪於岸有頃冰
還謂官屬令相助曰南向要中正白者我綬也還復對鬪主
簿刺殺其北面者江神死後無復患

田齊食貨

河渠附

粟

蘇秦曰齊地方二千里帶甲數十萬粟如邱山按詩含神霧云齊地處孟春之位海岱之間土地汙泥流之所歸利之所聚律中太簇音中宮角

魚鹽

國策齊潛王獻魚鹽之地三百於秦按管子云齊有渠展之鹽請君伐菹薪煮水爲鹽煮沸水也征而積之十月至正月成三萬六千鐘下令曰孟春農事起無得煮鹽此則坐長十倍桓公糶之得成金萬一千斤國語云齊通魚鹽於東萊

田租 徭役

說苑齊宣王出獵於社山社山父老十三人相與勞王王曰
父老苦矣謂左右賜父老田不租父老皆拜閭邱先生獨不
拜又賜無徭役諸父老皆拜閭邱先生又不拜

河隄

賈讓治河三策云隄防之作近起戰國齊與趙魏以河爲境
齊地卑下作隄去河二十五里河水東抵齊隄則西泛趙魏
趙魏亦爲隄去河二十五里○此廿二字原脫依漢書補雖非其正水尙
有所游盪時至而去則填淤肥美民耕田之或久無害稍築
室宅排水澤而居之湛溺固其宜也按宋太祖云夏后治水
但言導河至海隨山濟川未聞力制湍流廣營高岸自戰國
專利堙塞故道以小防大以私害公九河之制遂隳歷代之

患弗弭

楚食貨

附河渠

粟

蘇秦曰楚地方五十里帶甲百萬車千乘騎萬匹粟支十年

橘柚

蘇秦說趙肅侯大王誠能聽臣燕必致羶裘狗馬之地齊必致魚鹽之地楚必致橘柚雲夢之地屈原九章有橘頌后皇嘉樹橘徠服兮受命不遷生南國兮言楚王好草木之樹而橘生其土也

三錢

越世家楚王赦常封三錢之府注金幣二等也又楚有銅官

洲鑄錢其上詳職官

更幣

史記孫叔敖爲楚相莊王以爲幣輕更以小爲大百姓不便相言之王復如故

賦

左傳楚爲掩爲司馬子木使它賦數甲兵甲午蔦掩書土田度山林鳩數澤辨京陵表淳鹵數疆潒規偃豬町原防牧隰臬井衍沃量入修賦賦車籍馬賦車兵徒兵甲楯之數旣成以授子木禮也

均輸

越絕書吳兩倉春申君所造西倉名曰均輸東倉周一里八

步

芍陂

皇覽云楚大夫子思造芍陂水利通考云楚孫叔敖起芍陂而楚受其利淮南子孫叔敖決期思之水而灌雲稹之野莊王知其可以爲令尹也一統志云孫叔敖爲楚相截汝墳之水作塘以溉田民獲其利

無錫河 申浦

越絕書云無錫河者春申君治以爲陂鑿語昭賈以東到大田田名胥卑鑿胥卑下以南注大湖以寫西野去縣三十五里一統志南直常州申浦在江陰縣西三十里昔春申君開置田爲上下屯自大江南導分而爲二東入無錫西入武進

戚墅俱達於運河今江陰之山川多以春申取義

溝渠

漢書溝洫志於楚西方則通渠漢川雲夢之際東方則通溝
江淮之間

趙食貨

粟

蘇秦曰趙粟支十年陸深燕閒錄曰禹貢八州皆有貢物而
冀州獨無之冀卽今之山西土瘠天寒生物鮮少蓋自古而
然余按山西在戰國時大半屬趙以此知趙亦瘠國也

田稅

史記平原君家不肯出田稅趙奢爲趙田部吏以法治平原

用事者九人列國紀聞云稅歛之法趙不如楚楚不如秦深
言秦賦之繁也

趙錢

古錢經云趙錢仍晉舊內外皆圓 史記趙王使人徵隨張
儀奉以車馬金錢不言錢制未知經文何據世言錢起於太
公九府圜法前漢志云凡貨金錢布帛爲用夏殷以來其詳
靡記鹽鐵論云夏后氏以貝殷以紫石後世或金錢刀布故
或疑周以前未用錢也然史記曰紂厚賦歛以實鹿臺之錢
又曰散鹿臺之錢高謙之曰昔禹遭大水以歷山金鑄錢救
人之困湯遭大旱以莊山金鑄錢贖人之賣子是三代皆鑄
錢不但周也宋洪遵所纂泉志其正用品有真錢夏錢商錢

周錢景王錢齊錢晉錢楚錢趙錢

漳水

趙惠文王二十四年趙徙漳水武平曲

魏食貨

河渠附

行田百畝

漢書志云襄王以史起爲鄴令起進曰魏氏之行田也以百畝鄴獨二百畝是田惡也注云以百畝謂賦田之法一夫百畝

盡地方之教

通典魏文侯使李悝作盡地方之教以爲地方百里提封九萬頃除山澤邑居三分去一爲田六百萬畝理田勤謹則晦

益三升臣瓚曰當言三斗謂治田勤則增益三斗不勤則損亦如之地方百里之增減輒爲粟八十萬石必雜五種以備災害力耕數耘收穫如寇盜之至環廬樹桑菜茹有畦瓜瓠果菰殖於疆場

地大稅寡 什一之稅

荀子論魏兵云地雖大其稅必寡是危國之兵也注云優復既多則稅寡資用貧乏故國危什一之稅詳李悝糴法又魏文侯時租賦倍增於常或有賀者文侯曰今戶口不加而租賦歲倍此由課多也譬彼治治令大則薄令小則厚治人亦如之夫貪其賦稅不愛人是猶虞人反裘而薪也徒惜其毛而不知皮盡而毛無所附

賦鳩 賦口

文選箋引尸子注云魏之於百姓也日食不賦鳩民疫不賦

口許慎淮南注戰國收民役賦不畢者榜之於格上不得下故曰枕格而死也

農官讀法

桓子新論魏三月上祀農官讀法法曰耒無十其羽鋤無泥其塗春田如布平以直夏田如鶩秋田惕惕如寇來不可測冬田吳越視上上之田收下下女則有罰下下之田收上上女則有賞

李悝平糴

漢書李悝既爲文侯作盡地力之教又曰糴甚貴傷民此民謂土工商甚賤傷農民傷則離散農傷則國貧故甚貴與甚賤其傷一也善爲國者使民不傷而農益勸今一夫挾五口治田

百畝歲收晦一石半為粟百五十碩除什一之稅據此魏亦行什一稅

也法十五碩餘百三十五碩食人月一碩半五人終歲為粟九

十碩餘有四十五碩碩三十為錢千三百五十除社閭嘗新

春秋之祠用錢三百餘千五十衣人率用錢三百五人終歲

用千五百不足四百五十不幸疾病死喪之費及上賦歛又

未與此此農所以常困有不勸耕之心而令糴至於甚貴也

故善平糴者謹視歲有上中下熟上熟其收自四餘四百石

張晏曰平歲百畝收百五十石今大熟四倍收六百石計民食終歲長四百石官糴三百石此為糴三而舍一也中

熟自三餘三百石自三四百五十石也終歲長三百下熟自

倍餘百石自倍收三百石終歲長百石官糴其五十石云小

饑則收百石平歲百畝之收收百五十石今中饑七十石收

分之大饑三十石收五分之一也以此準故大熟則上糴三

而舍一中熟則糴二下熟則糴一詳見上文使民適足賈平則止

小饑則發小熟之所歛官以歛藏中饑則發中熟之所歛大

饑則發大熟之所歛而糴之故雖遇饑饉水旱糴不貴而民

不散取有餘以補不足也行之魏國國以富强呂祖謙曰大

論之先王有預備之政上也修李悝之政次也蓄積有可均虛使之流通移民移粟又次也咸無焉設糜粥最下也

移粟

劉向孟子注魏惠王三十五年河內復旱秋無禾於是惠王

乃議移食羣臣曰不可民不可移也將軍王敖曰天乙逐桀

囚之漆城武王伐紂黃鉞斬首聖人造事其次繼事因事最

下今羣臣皆因王其造之於是惠王移民河東以就食移粟

於河內以給糴老三十六年河東大凶移民河內以就食而移粟於河東

發鼓

薛瓚漢注引汲郡古文云梁惠王發逢忌之鼓以賜民又魏文侯有御廩見說苑

十二渠

魏文侯時西門豹爲鄴令往到鄴問民疾苦長老曰苦爲河伯娶婦以故貧鄴三老廷掾常歲賦歛百姓得錢數百萬用其三十萬爲河伯娶婦當其時巫行視民家好女輒聘爲河伯婦爲治新繒綺縠衣閒居齋戒築齋居河上張緹絳帷女居其中爲具牛酒飲食共粉飾如嫁女狀浮之河行數十里

乃沒民俗相戒曰卽不爲河伯娶婦水來漂沒溺其人民云
西門豹曰嫁河伯婦願往觀也於是嫁河伯婦時三老官屬
豪長者里父老皆會民往觀者三千人西門豹亦往會河上
其巫老女子也年七十從女弟子皆衣繒單衣立大巫後西
門豹曰呼河伯婦來因出女帷中豹顧謂三老巫祝曰女醜
大巫可入報河伯當更求好女命投大巫河中有頃曰何久
也弟子趣之復投一弟子河中有頃又投一弟子河中如是
者三西門豹曰女子不能白事復投三老河中西門豹簪筆
磬折立河上待良久欲復使廷椽與豪長者入趣之皆叩頭
且流血曰不敢復爲河伯娶婦鄴吏民大驚於是西門豹曰
害不去利不興非國也吾爲魏興利鑿渠十二父老子弟雖

煩苦然百歲後期令父老子弟思吾言卽發民鑿十二渠引河水灌民田魏由是得水利見史記

漳渠

漢書溝洫志文侯曾孫襄王卽位與羣臣飲酒祝曰令吾臣皆如西門豹也史起進曰魏氏之行田也以百畝鄴獨二百畝是田惡也漳水在其旁西門豹不能用是不智知而不與是不仁仁智豹未之盡何足法也於是以史起爲鄴令遂引漳水溉鄴以富魏之河內民歌之曰鄴有賢令爲史公決漳水兮灌鄴旁終古焉爾兮生稻粱史河渠書云西門豹引漳水溉鄴以富魏之河內與漢書異一統志亦云河南彰德府有西門渠云西門豹所鑿引漳水以溉田杜氏通典云漳渠

史起所鑿史記誤不知當作何說也按左思魏都賦西門漑其前史起灌其後塏流十二同原異口畜爲屯雲泄爲行雨

晉東晉傳云兩周爭東西之流史起惜漳渠之浸明地刑之重也括地志云漳水源出潞洲長子縣西力黃山

白圭治水

宋蘇軾雜策云方戰國之用兵國於河之壩者三晉爲多而魏文侯時白圭治水最爲有功而孟子譏其以鄰國爲壑

李悝廢溝洫

水利拾遺云李悝以溝洫爲墟自謂過於周公

北郭大溝

玉海二十一卷內引水經注云浚儀縣竹書紀年梁惠成王三十一年三月爲大溝於北郭以行圃田之水今按竹書紀

年云梁惠成王十年入河水於甫田又爲大溝而引甫水

河伯娶婦

詳見十二渠 按玉海云河患自戰國始而禹功廢矣周譜云定王五年河徙碣礫蓋已失其故道大事記云威烈王十三年晉河岸崩壅龍門至於砥柱春秋後河患見史傳始於此賈讓曰戰國壅防百川各以自利此孟子所謂以鄰國爲壑也王橫曰秦攻魏決河灌其都決處遂大不可復補噫微禹吾其魚乎秦灌大梁以魚其民禍不止於一時而河流潰溢遂爲無窮之患重以決通隄防隳壞禹迹甚矣其不仁也李垂導河勝書曰春秋二百四十有二年災異畢書獨不書河決者夏禹故道尙存也

韓食貨

粟

按國策蘇秦說秦惠王曰秦沃野千里蓄積饒多說齊宣王曰齊粟如邱山說楚威王曰楚粟支十年說趙肅侯曰趙粟支十年說燕文侯曰燕粟支十年獨韓魏不言粟諱之也張儀爲秦說韓王曰韓地險惡山居五穀所生非麥而豆民之所食大抵豆飯藿羹一歲不收民不厭糟糠地方不滿九百里無二歲之所食

燕食貨

粟 丹泉粟

蘇秦曰燕地方二千里帶甲數十萬車七百乘騎六千匹粟

支十年南有碣石鴈門之饒北有棗粟之利民雖不田作棗粟之實足食於民矣此所謂天府也拾遺記曰燕昭王卽位廣延國來獻舞者二人王處以丹綃華幄飲以瑤琨之膏飴以丹泉之粟燕世家燕昭王弔死問孤與百姓同甘苦二十八年燕國殷富

棗粟

詳見上按春秋說題辭云箕尾爲燕陰氣侵生欲俗云貪利地宜粟漢書云燕秦千樹粟其人與千戶侯等

魚鹽

玉海云碣石在海旁鴈門有鹽澤故云碣石鴈門之饒今人知齊人之有鹽利不知燕也漢書云上谷至遼東有魚鹽棗

粟之饒

穰裘

蘇秦說趙肅侯曰大王能聽臣燕必致穰裘狗馬之地

七國攷卷二終

七國攷卷三

秦都邑

關塞附

大邱

秦紀非子居大邱周孝王分土爲附庸邑之秦注今天水隴邱縣秦亭也地理志今隴西秦亭秦谷是也括地志秦州清水縣本名秦嵬姓邑漢屬天水郡水經注清水逕清水城南又西與秦水合水出東北大隴山秦谷歷三泉合成一水而歷秦川川有故亭秦仲所封也秦之爲號始是秦水又西南歷隴川逕六槃口過清水城西南注清水與地廣記秦州隴城縣有秦谷郡縣志秦城在隴州東南二十五里世本云秦非子始封於秦故秦本紀稱周孝王曰朕分之土邑秦隴西

秦谷亭是也

廢邱

秦紀莊公居其故西大邱世紀周懿王所都今槐里是也世本云秦非子元孫莊公徙廢邱

汧渭之會

秦紀平王封襄公爲諸侯賜之岐以西之地于是始國文公居西垂宮東獵至汧渭之會乃卜居之占曰吉卽營邑之括地志故汧城在隴州汧源縣南三里世紀云襄公二年徙居汧卽此城郿縣故城在岐州鳳翔府郿縣東北十五里文公東獵汧渭之會卜居之乃營邑焉卽此城也世紀文公徙汧今扶風郿縣是也

平陽

世紀云出公徙平陽郡之平陽亭是也秦紀云寧公徙平陽括地志平陽故城在岐州岐山縣西四十六里秦寧公徙都之處岐山縣有平陽鄉鄉內有平陽聚武公居平陽封宮正義云在平陽城內水經注汧水逕郁夷縣逕平陽故城南

雍城

秦紀德公初居雍城大鄭宮卜居雍子孫飲馬于河世紀云今扶風雍是也括地志岐州雍縣南七里故雍城秦德公大鄭城也秦紀康公居雍高寢桓公居雍太寢今鳳翔府天興縣

櫟陽

秦紀獻公城櫟陽徙都之世紀今馮翊萬年是也括地志櫟陽故城一名萬年城在雍州東北百二十里漢七年分櫟陽城內爲萬年縣通典漢萬年縣在京兆府櫟陽縣東北二十里櫟陽故城是周明帝省萬年入廣陽更于長安城中置萬年縣仍移廣陽縣入舊萬年縣城卽今櫟陽縣是也

咸陽

秦紀孝公十二年作爲咸陽築冀闕徙都之按別紀云孝公十三年始都咸陽蓋十二年築闕而十三年都之也世紀漢元年更名新城屬扶風後并于長安故太史公曰長安故咸陽也元鼎三年復別爲渭城今長安西北渭水陽有故城西京賦秦里其朔實爲咸陽括地志咸陽故城一名渭城在雍

州咸陽縣東十五里京城北四十五里卽秦徙都者今咸陽縣古之杜郵劉伯莊云冀猶記事闕猶象魏也始皇置酒咸陽宮營作朝宮渭南上林苑中先作前殿阿房爲閣道自殿下直抵南山爲複道自阿房渡渭屬之咸陽自孝公至子嬰十世居咸陽元和郡縣圖志山南曰陽水北曰陽在北山之南渭水之北故曰咸陽西都賦云左據函谷二嶠之阻表以太華終南之山右界褒斜隴首之險帶以洪河涇渭之川衆流之隈汧湧其西華實之毛則九州之上腴焉防禦之阻則天地之與區焉是故橫被六合三成帝畿周以龍興秦以虎視蘇秦說秦惠王曰大王之國西有巴蜀漢中之利北有胡貉代馬之用南有巫山黔中之限東有殽函之固田肥美民

殷富戰車萬乘奮擊百萬沃野千里蓄積饒多地勢形便此

所謂天府天下之雄國也

淮南注云神農明堂曰天府蘇秦天府二字本此謂可以建都之地

也胡三省通鑑注云河自龍門上口南抵華陰而東流秦國

在河之西山自鳥鼠同穴連延爲長安南山至于太華秦國

在山之西韓魏趙齊楚燕六國皆在河山以東荀子應侯問

孫卿曰入秦何見孫卿曰其國塞險形勢便山林川澤美天

材之利多是形勝也入境觀其風俗其百姓樸其聲樂不流

汗其服不挑甚畏有司而順古之民也及都邑官府其百吏

肅然莫不恭儉敦敬忠信而不桀古之吏也入其國觀其士

大夫出于其門入于公門出于公門歸于其家無有私事也

不比周不朋黨倜然莫不明通而公也古之士大夫也觀其

朝廷其間聽決百事不留恬然如無治者古之朝也故四世有勝非幸也數也是所見也故曰佚而治約而詳不煩而功治之至也秦類之矣雖然則甚有其謬也兼數具者而盡有之然而縣之以王者之功名則倜倜然其不及遠矣是何也則殆其無儒耶漢書志云秦地于天官東井與鬼之分野也其界自宏農故關以西京兆扶風馮翊北地上郡西河安定天水隴西南有巴蜀廣漢犍爲武都西有金城武威張掖酒泉敦煌又西南有牂牁越雋益州皆宜屬焉秦地于禹貢時跨雍梁二州詩風兼秦幽兩國昔后稷封釐公劉處幽太王徙岐文王作鄠武王治鎬其民有先王遺風好稼穡務本業故幽詩言農桑衣食之本甚備有鄠杜竹林南山檀柘號稱

陸海爲九州膏腴始皇之初鄭國穿渠引涇水溉田沃野千里民以富饒漢興立都長安徙齊諸田楚昭屈景及諸功臣家于長陵後世世徙吏二千石高訾富人及豪傑并兼之家于諸陵蓋亦以強幹弱支非獨爲奉山園也是故五方雜厝風俗不純其世家則好禮文富人則商賈爲利豪傑則遊俠通姦瀕南山近夏陽多阻險輕薄易爲盜賊常爲天下劇又郡國輻奏浮食者多民去本就末王侯貴人車服僭上衆庶放效羞不相及嫁娶尤崇侈靡送死過度天水隴西山多林木民以板爲室屋及安定北地上郡西河皆迫近戎狄修習戰備高上氣力以射獵爲先故秦詩曰在其板屋又曰王于輿師修我甲兵與子偕行及車麟四鐵小戎之篇皆言車馬

田狩之事漢興六郡良家子選給羽林期門以材力爲官名將多出焉孔子曰君子有勇而亡義則爲亂小人有勇而亡義則爲盜故此數郡民俗質木不恥寇盜自武威以西本匈奴昆邪王休屠王地武帝時攘之初置四郡以通西域隔絕南羌匈奴其民或以關東下貧或以報怨過當或以諄逆亡道家屬徙焉習俗頗殊地廣民稀水草宜畜牧故涼州之蓄爲天下饒保邊塞二千石治之咸以兵馬爲務酒禮之會上下通焉吏民相親是以其俗風雨時節穀糴常賤少盜賊有和氣之應賢于內郡此政寬厚吏不苛刻之所致也巴蜀廣漢本南夷秦并以爲郡土地肥美有江水沃野山林竹木蔬食果實之饒南賈滇粵僮西近邛笮馬旄牛民食稻魚亡凶

年憂俗不愁苦而輕易淫佚柔弱褊陋景武間文翁爲蜀守
教民讀書法令未能篤信道德反以好文刺譏貴慕權勢及
司馬相如游宦京師諸侯以文辭顯於世鄉黨慕循其迹後
有王褒嚴遵楊雄之徒文章冠天下繇文翁倡其教相如爲
之師故孔子曰有教無類武都地雜氐羌及犍爲牂牁越巂
皆西南外夷武帝初開置民俗略與巴蜀同而武都近天水
俗頗似焉故秦地天下三分之一而人衆不過什三然量其
富居什六秦幽吳札觀樂爲之歌秦曰此之謂夏聲自井十
度至柳三度謂之鶉首之次秦之分也又漢志云雍州其山
鎮曰吳嶽國語謂之西吳古文以爲泝山秦都咸陽以爲西
嶽

函谷關 以下附東

賈子過秦論曰秦孝公據殽函之固范雎謂左關阪卽殽函也鹽鐵論曰秦邑商洛殽函以禦諸侯淮南陸形訓九塞曰殽阪按函谷關在陝州靈寶縣西南十二里西征記曰關城路在函中深險如函故以爲名其中劣通東西十五里絕岸壁立崖上栢林蔭谷中殆不見日關去長安四百里日入則閉雞鳴則開秦法也東自峭山西至潼津通名函谷號曰天險所謂秦得百二也孟嘗君客雞鳴出函谷燕太子丹亦雞鳴出函谷博物志云秦前有藍田之鎮後有胡苑之塞左殽函右隴蜀西通流沙險阻之國也西征賦云躡函谷之重阻看天險之襟帶跡諸侯之勇怯莫算嬴氏之利害或開關以

延敵競遁逃以奔竄有噤門而莫啟不窺兵于山外班固西
都賦注云函谷者其谷似函故曰函谷江統函谷關賦云唯
七國之西征仰斯阻而震恐豈隘險之難犯將羣帥之無勇
鹽鐵論云諸侯之有關梁庶人之有爵祿非升平之興蓋自
戰國始也

武關

南

散關

西

蕭關

北

臨晉關

張儀曰秦地被山帶河四塞以爲固徐廣曰東函谷南武關
西散關北蕭關武關卽建武關也張衡東京賦秦負阻於二
關注云二關武關函谷關也通鑑卽墨大夫見齊王曰齊地
方數千里帶甲數百萬王收而與之百萬人之衆使收三晉
之故地卽臨晉之關可以入矣鄒郢大夫不欲爲秦而在城

南下者百數王收而與之百萬之師使收楚故地卽武關可以入矣胡三省云收三晉兵自河東攻秦則入臨晉關楚攻秦自南陽入武關七國形勢攷云秦地西有隴關東有函谷臨晉南有嶢武關北有蕭居庸天井關以臨胡庭故曰關中賈誼新書云所謂建武臨晉函谷關者大抵備山東諸侯也武關在商州商洛以限南諸侯函谷在陝州靈寶以限北諸侯臨晉在同州朝邑以限東諸侯隴關卽隴山關也七國形勢攷引正義云秦東有函谷蒲津龍門合河等關南山及武關嶢關西有大隴山及隴山關大震烏蘭等關北有黃河南塞故曰被山帶河四塞以爲固臣瓚曰臨晉者秦築高壘以臨晉國故曰臨晉

湖關

史記秦昭王使謁者王稽於魏載范雎入秦至湖關望見穰侯車騎東行縣邑

松柏塞

荀子曰秦有松柏之塞

焉氏塞 鄭所塞

呂覽曰公子連亡在魏欲入從鄭所之塞右主然守塞弗入公子連去入翟從焉氏塞茵改入之

長城

王應麟曰秦昭王滅義渠於是秦有隴西北地上郡築長城以距胡非自始皇始也古今注云秦築長城土色皆紫故稱

紫塞楊泉物理論云始皇使蒙恬築長城死者相屬民歌曰
生男慎勿舉生女哺用哺不見長城下尸骸相撐拄北邊備
對云秦城多承燕趙燕城起於造陽而至襄平遼陽造陽者
上谷地也襄平者遼東縣也遼陽者遼水之北也皆燕國邊
胡之地故其建築亦在此地也趙之城則自代地而西屬於
高闕代者鴈門都也高闕者靈州北流河之西陰山之上游
也趙武靈王國於雲代故其備胡之城但能並河而西以極
乎趙境耳至秦已并六國天下爲一西自上郡北地而東至
遼東西悉爲秦有故蒙恬之致役也西起臨洮則中國極西
之地也北屬遼東則中國極東之地也自東迄西殆萬餘里
無論燕趙之與岷蘭其在當時蓋無一地而無長城也於是

會合三制而要其所宿則秦城之長固周乎中國之北矣然
審而求之則其城不皆秦築也秦但補築使足耳元和志云
開皇城自代之繁峙縣北經蔚州北十里入飛狐縣夫其自
代而蔚則極北而與虜邊中國之地不出此外秦人爲城以
城中夏勝地固當在此矣志又曰開皇城起嵐州合河縣經
幽州皆因古迹修築夫嵐州者樓煩郡也初爲胡地後爲趙
惠文所取則合河縣固可立城矣幽州者戰國時屬燕地則
非趙人所有何由可施版築也是前乎燕趙別有築之者史
所不傳故概言因古跡修築也

田齊都邑

臨淄

通釋齊田和立爲齊侯都臨淄國策蘇秦說齊宣王曰齊南有泰山東有琅琊西有清河北有渤海此所謂四塞之國也臨淄甚富而實其民無不吹竿鼓瑟擊筑彈琴關雞走狗六博踏鞠者臨淄之途車轂擊人肩摩連袂成幃舉袂成幕揮汗成雨家敦而富志高而揚田肯曰齊東有琅琊卽墨之饒南有泰山之固西有濁河之限北有渤海之利地方二千里持戟百萬縣隔千里之外齊得十二焉此東秦也荀卿子說齊相曰今巨楚縣吾前大燕鱗吾後勁魏鈎吾右西壤之不絕若繩楚人則有襄賁開陽以臨吾左是一國作謀則三國必起而乘我如是則齊必斷而爲四三國若假城然耳鹽鐵論曰齊撫阿甄關榮歷倚泰山負海隅漢地理志曰齊地虛

危之分野也東有淄川東萊琅琊高密膠東南有泰山城陽
北有千乘清河以南渤海之高樂高城重合陽信西有濟南
平原皆齊分也少昊之世有爽鳩氏虞夏時有季荊湯時有
逢公柏陵殷末有蒲姑氏皆爲諸侯國此地至周成王時蒲
姑氏與四國共作亂成王滅之以封師尙父是爲太公詩風
齊國是也臨淄名營邱故齊詩曰子之還矣遭我乎穠之間
兮又曰俟我於著乎而此亦其舒緩之體也吳札聞齊之歌
曰泱泱乎大風也哉其太公乎國未可量也古有分土亡分
民太公以齊地負海舄鹵少五穀而人民寡乃勸以女工之
業通魚鹽之利而人物輻湊後十五世桓公用管仲設輕重
以富國合諸侯成伯功身在陪臣而取三歸故其俗彌侈織

作冰紈繡綺純麗之物號爲冠帶衣履天下初太公治齊修道術尊賢智賞有功故至今其土多好經術矜功名舒緩濶達而足智其失夸奢朋黨言與行繆虛詐不情急之則離散緩之則放縱始桓公兄襄公淫亂姑姊妹不嫁於是令國中民家長女不得嫁名曰巫兒爲家主祠嫁者不利其家民至今以爲俗痛乎道民之道可不慎哉臨淄海岱之間一都會也其中具五民云

陽關以下附南

博物志云齊南有長城巨防陽關之險北有河濟足以爲固越海而東通於九夷西界岱嶽配林之險坂固之國也史記齊世家魯伐我入陽關徐廣曰在鉅平括地志云兗州博平

縣南二十九里西臨汶水

穆陵關

山東志穆陵關在沂水縣北一百二十里古齊關也

博關

張儀說齊曰悉趙兵渡清河指博關臨淄卽墨非王之有也
史記齊宣王二年三晉之王皆因田嬰朝齊王子博望關而
去輿地廣記博州戰國屬齊趙衛三國之交徐廣曰齊威王
六年晉伐齊至博陵

長城

泰山記云泰山西有長城緣河經泰山千餘里至琅琊臺入
海國策蘇秦云長城鉅防以爲塞齊記云齊宣王乘山嶺之

上築長城東至海西至濟州千餘里以備楚括地志西北起濟州平陰縣緣河歷泰山城岡上經濟州淄州卽西南兗州博城縣北東至密州琅琊臺入海正義長城西在濟州平陰縣界竹書紀年梁惠成王二十年齊閔王築防以爲長城郡縣志故長城首起鄆州平陰縣北二十九里齊湣王所築外紀威烈王十六年王命韓趙伐齊入長城田世家趙人歸我長城在齊威王時山東志齊長城在諸城縣南四十里跨安邱境連巨蒙秦萊蕪直至平陰乃齊宣所築以禦楚寇者

楚都邑

關塞附

丹陽

通釋楚熊繹當周成王時封於楚蠻居丹陽地輿志秭歸縣

東有丹陽城周迴八里熊繹始封也丹陽凡有數處楚鬻熊始封丹陽則在今秭歸縣後楚文王徙都江陵府枝江縣亦曰丹陽漢于宛陵置丹陽郡隋于丹州置丹陽郡唐于京口置丹陽郡而西漢志乃以曲阿之丹陽爲楚所封誤矣

郢

楚文王始都郢括地志云平王城郢在江陵縣東北十六里故郢城是也楚始都丹陽在今枝江文王遷郢昭王遷鄢皆在今江陵境中杜預左傳注云楚國今南郡江陵縣北紀南城也謝靈運鄴中集詩云南登宛郢城今江陵北十二里而有紀南城卽古之郢都也又謂之南郢桓譚新論曰楚之郢都車掛轂民摩肩市路相交號爲朝衣新而暮衣敝

都

楚昭王去郢北徙都都輿地廣記都縣故都國春秋時自商密遷此爲楚附庸楚滅之昭王畏吳自郢遷焉後復還郢吳越春秋作昭王徙于蔿若注云蔿若字誤當作都蘇秦說楚威王曰楚地西有黔中巫郡東有夏州海陽南有洞庭蒼梧北有汾涇之塞郇陽

陳城

楚襄王二十三年秦拔郢都北保于陳城

壽春

考烈王二十二年冬徙都壽春命曰郢今安豐軍壽春縣漢地理志云楚地翼軫之分野也今之南郡江夏零陵桂陽武

陵長沙及漢中汝南郡盡楚分也周成王時封文武先師鬻熊之曾孫熊繹於荊蠻爲楚子居丹陽後十餘世至熊達是爲武王寢以強大後五世至莊王總帥諸侯觀兵周室并吞江漢之間內滅陳蔡之國後十餘世頃襄王東徙於陳楚有江漢川澤山林之饒江南地廣或火耕水耨民食魚稻以漁獵山伐爲業果蔬蠃蛤食物常足故皓寤媮生而亡積聚飲食還給不憂凍餓亦亡千金之家信巫鬼重淫祀而漢中淫佚枝柱與巴蜀同俗汝南之別皆急疾有氣勢江陵故郢都西通巫巴東有雲夢之饒亦一都會也

扞關以下附

七國形勢考云楚肅王四年周安王二十五年蜀伐楚取茲

方楚爲扞關以拒之鹽鐵論云楚自巫山起方城屬巫黔中設扞關以拒秦一名扞關括地志今陝州巴山縣界張儀說楚王曰秦西有巴蜀方船積粟起於汶山浮江以下不至十日而距扞關扞關驚則從竟陵以東盡城守矣黔中巫郡非王之有

江關 陽關

華陽國志巴楚相攻伐故置江關陽關括地志云江關今夔州魚復縣南二十里江南岸白帝城是陽關今涪州永安縣治關城也

弱關

水經注江水自關東逕弱關扞關弱關在建平秭歸界昔巴

楚數相攻伐藉險置關以相防捍

昭關

范雎傳子胥橐載而出昭關夜行晝伏

陘塞

國策北有汾陘之塞徐廣曰春秋齊伐楚次於陘楚威王十一年魏敗楚陘山在密縣正義曰陘山在鄭州新鄭縣西南三十里楚世家魏取我陘山在鄭陘塞其說有三山海經有少陘之山太平御覽謂滎陽則正義新鄭近之滎陽春秋爲鄭戰國爲韓蓋南北之隘道楚爲塞以御北方故蘇秦於韓曰南有陘山於楚曰北有陘塞其地一也楚漢亦於此決勝負焉左傳楚子廉治兵於汾注云襄城縣東北有汾邱城今

襄城屬汝州汾陘之塞蓋在汝鄭二州

黽阨之塞

史記秦踰黽阨之塞而攻楚不便劉昭曰江夏郡鄖縣古黽阨之塞也

符離之塞

國策楚苞九夷地方千里西有符離之塞北有甘魚之口

方城 萬城

淮南兵略訓曰楚地南卷沅湘北饒潁泗西包巴蜀東襄鄴淮潁汝以爲洫江漢以爲池垣之以鄧林綿之以方城山高尋雲谿肆無景荀子議兵曰汝潁以爲險江漢以爲池限之以鄧林緣之以方城左傳云方城以爲城地理志葉縣有長

城號曰方城朱子曰荆地勢四平其守當在外楚人謂方城
爲城漢水爲池是也博物志云楚後背方城前及衡嶽左則
彭蠡右則九疑有江漢之流實險阻之國也盛宏之荊州記
云葉東界有故城始鰲縣東至瀕水達泚陽界南北聯亘數
百里號爲方城一謂之長城南北雖無基築皆連山相接而
漢水流其南郭仲產曰若萊於東俱有方城又楚狂接輿耕
於城之南皆傍此長山方城而名者也又唐勒奏土論云楚
世伯南土自越以至葉宏境萬里故號曰萬城楊用修以方
城爲萬城伯晦引史記阻之以鄧林緣之以方城及服虔杜
預之說以闕之

桓寬鹽鐵論云楚有汝淵蒲堂之困

趙都邑

關塞

趙城

史記趙之先造父封趙城通釋云在晉州趙城縣

耿

晉獻公賜趙夙耿通釋云河中府龍門縣東南索隱云今河東皮氏耿鄉也

原

趙世家重耳爲晉文公趙衰爲原大夫居原任國政括地志故原城在懷州濟原縣西北二里左傳云襄王以原賜晉文公原不服文公伐原以示信原降以趙衰爲大夫卽此也原本周畿內邑也索隱曰系本成季徙原列國紀聞云襄子嘗居原

晉陽

趙世家趙襄子時知伯率韓魏攻趙趙襄子懼乃奔保晉陽
列國紀聞云趙簡子居晉陽

中牟

趙獻侯治中牟索隱曰在河北非鄭之中牟地理志河南中
牟縣趙獻侯自耿徙此

邯鄲

趙敬侯元年始都邯鄲蘇秦說趙肅侯曰山東之建國莫如
趙強地方三千里西有常山南有河漳東有清河北有燕國
宋白曰邯鄲本衛地後屬晉七國時爲趙郡趙敬侯自晉陽
始都邯鄲地理志云自中牟徙此按史記六國年表周安王

之十六年趙敬侯之元年烈王之二年趙成侯之元年成侯二十二年魏克邯鄲是年顯王之十六年也二十四年魏歸邯鄲若敬侯已都邯鄲魏克其國都而趙不亡何也至顯王三十二年公子范襲邯鄲不勝而死是年肅侯之三年也意此時趙方都邯鄲蓋肅侯徙都非敬侯也漢志云趙地昂畢之分野趙分晉得趙國北有信都真定常山中山又得涿郡之高陽鄭州鄉東有廣平鉅鹿清河河間又得渤海郡之東平舒中邑文安東州成平章武河以北也南至浮水繁陽內黃斥邱西有太原定襄雲中五原上黨上黨本韓之別郡也遠韓近趙後卒降趙皆趙分也趙中山地薄人衆猶有沙邱紂淫亂餘民丈夫相聚遊戲悲歌忼慨起則椎剽掘塚作姦

巧多弄物爲倡優女子彈絃跕躑游媚富貴徧諸侯之後宮
邯鄲北通燕涿南有鄭衛漳河之間一都會也其土廣俗雜
大率精急高氣勢輕爲姦太原上黨又多晉公族子孫以詐
力相傾矜夸功名報仇過直嫁娶送死奢靡漢興號爲難治
常擇嚴猛之將或任殺伐爲威父兄被誅子弟怨憤至告訐
刺史二千石或報殺其親屬鍾代以北迫近匈奴民俗悍伎
好氣爲姦不事農桑自全晉時已患其剽悍而武靈王又益
厲之故冀州之部盜賊常爲它州劇定襄雲中五原本戎狄
地頗有趙齊魏楚之徒其民鄙樸少禮文好射獵鴈門亦同
俗於天文別屬燕

信都

李公緒趙記云趙孝成王造檀臺之宮爲趙都朝諸侯故曰信都亦見宮室攷又史記云客說張耳曰兩君羈旅難以獨立立趙後扶以義可以就功乃求趙歇立爲趙王居信都

扞關

以下附

蘇厲爲齊遺趙王書曰秦之上郡近扞關至於榆中千五百里呂氏云扞者扞敵之扞非關名也趙之扞關陸道之關也楚之扞關水道之關也

句注塞

句注塞者呂氏春秋九塞之一也句奴傳趙襄子踰句注而破并代張儀說燕曰昔趙襄子欲并代與代王遇於句注之塞郡縣志晉威寧二年句注碑曰蓋北方之險有盧龍飛狐

句注爲之首天下之阻所以分別外內博物志云趙東臨九州西瞻恒嶽有沃瀑之流飛狐井陘之險至於潁陽涿鹿之野鹽鐵論云趙結飛狐句注以存荆代一統志云句注山在代州西二十五里一名西陘史記正義云夏屋與句注相接

鴈門塞

鴈門山在代州北三十五里志云以鴈出其門故名鴈門塞關因山以立凡山西之關四十有餘皆踞隘保固而聳拔雄壯則鴈門爲最故趙李牧漢邳都備邊於此匈奴不敢近塞固皆一時良將不可謂非地險也史記李牧者趙之北邊良將也常居鴈門備匈奴以便宜置吏市租皆輸入幕府爲士卒費日擊數牛饗士習騎射謹烽火多用間諜厚遇戰士爲

約曰匈奴卽入盜卽入收保有敢捕虜者斬匈奴每入烽火警輒入收保不敢戰如是數歲亦不亡失

高關塞

杜氏通典趙武靈王築長城自代傍陰山下至高關爲塞水經注云長城之際連山刺天其山中斷兩岸雙關善能雲舉望若闕焉節狀表目故有高關之名也自關北出荒中關口有城跨山結局謂之高關戍上古迄今常置重捍以防塞道

長城

括地志云趙武靈王長城在朔州善陽縣北今按史記趙肅侯七年築長城及武靈王北略中山之地至於房子遂之代北至無窮西至河登黃華之上召樓緩謀曰我先王因世之

變以長南藩之地屬阻漳滏之險立長城是武靈王之前已有長城疑括地志脫一字當是武靈王修長城也圖書記云趙簡子築長城以備狄又在肅侯之前矣虞氏記云趙侯自五原河曲築長城東至陰山又於河西造大城一箱崩不就乃改卜陰山河曲而禱焉晝見羣鵠游於雲中徘徊經日大光在其下乃卽於其處築城今雲中城是也

魏都邑

附關塞

魏

史記晉獻公以魏封畢萬魏城在陝州芮城縣北五里漢河北縣輿地廣記河中府永樂縣古魏國唐分芮城置水經注永樂澗水北出於薄山南流逕河北縣故城西故魏國也晉

以封畢萬左思賦魏者畢昴之所應虞夏之餘人先王之桑梓列聖之遺塵考之四隈則八埏之中測之寒暑則霜露所鈞

霍

魏悼子徙居霍晉州霍邑縣索隱曰系本云武仲生莊子絳無悼子又系本居篇曰魏武子居魏悼子徙霍宋忠曰霍地名今河東彘縣也則是有悼子系本卿大夫代自脫耳

安邑

地理志河東安邑魏絳自魏徙此魏世家武侯二年城安邑秦紀昭王二十一年魏獻安邑國策云安邑者魏之柱國晉陽者趙之柱國也鄢郢者楚之柱國也郡縣志安邑故城在

陝州夏縣東北十五里禹所都

柱國者都也

大梁

魏世家惠王三十一年秦用商君東地至河而齊趙數破我安邑近秦於是徙治大梁水經注大梁城本春秋之陽武高陽鄉於戰國爲大梁周梁伯之居今開封府祥符縣也魏又有少梁史記韓魏戰於少梁注魏有大梁故此稱少梁耳蘇秦說魏襄王曰大王之地南有鴻溝陳汝南許鄆昆陽召陵武陽新都新鄆東有淮潁煮棗無胥西有長城之界北有河外卷衍酸棗地方千里地名雖小然而田舍廬廡之數曾無所芻牧人民之衆車馬之多日夜行不絕鞬鞞殷殷若有三軍之衆臣竊料大王之國不下楚說趙曰秦之攻韓魏也無

有名山大川之限稍蠶食之傅國都而止張儀說魏王曰魏地四平諸侯四通輻湊無名山大川之限從鄭至梁二百餘里車馳人走不待力而至梁南與楚境西與韓境北與趙境東與齊境卒戍四方守亭障者不下十萬梁之地勢固戰場也梁南與楚而不與齊則齊攻其東東與齊而不與趙則趙攻其北不合於韓則韓攻其西不親於楚楚攻其南此所謂四分五裂之道也博物志云魏前枕黃河背漳水瞻王屋望梁山有藍田之寶浮池之淵漢地理志云魏地背觸參之分野也其界自高陵以東盡河東河內南有陳留及汝南之召陵滙疆新汲西華長平潁川之舞陽鄆許鄆陵河南之開封中牟陽武酸棗卷皆魏分也河內本殷之舊都周既滅殷分

其畿內爲三國詩風邶鄘衛國是也邶以封紂子武庚鄘管叔尹之衛蔡叔尹之以監殷民謂之三監故書序曰武王崩三監畔周公誅之盡以其地封弟康叔號曰孟侯以夾輔周室遷邶鄘之民於雒邑故邶鄘衛三國之詩相與同風邶詩曰在浚之下鄘曰在浚之郊邶詩又曰亦流於淇河水洋洋鄘曰送我淇上在彼中河衛曰瞻彼淇澳河水洋洋故吳公子札聘魯觀周樂聞邶鄘衛之歌曰美哉淵乎吾聞康叔之德如是是其衛風乎至十六世懿公亡道爲狄所滅齊桓公帥諸侯伐狄而更封衛於河南漕楚邱是爲文公而河內殷墟更屬於晉康叔之風旣歇而紂之化猶存故俗剛強多豪傑侵奪薄恩禮好生分河東土地平易有鹽鐵之饒本唐堯

所居詩風唐魏之國也周武王子唐叔在母未生武王夢帝
謂己曰余名而子曰虞將與之唐屬之參及生名之曰虞至
成王滅唐而封叔虞唐有晉水及叔虞子變爲晉侯云故參
爲晉星其民有先王遺教君子深思小人儉陋故唐詩蟋蟀
山樞葛生之篇曰今我不樂日月其邁宛其死矣他人是愉
百歲之後歸於其居民皆思奢儉之中念死生之慮吳札聞
唐之歌曰思深哉其有陶唐氏之遺民乎魏國亦姬姓也在
晉之南河曲故其詩曰彼汾一曲寘諸河之側自唐叔十六
世至獻公滅魏以封大夫畢萬滅耿以封大夫趙夙及大夫
韓武子食采於韓原晉於是始大至於文公伯諸侯尊周室
始有河內之土吳札聞魏之歌曰美哉颯颯乎以德輔此則

明主也文公後十六世爲韓魏趙所滅三家皆自立爲諸侯是爲三晉趙與秦同祖韓魏皆姬姓也自畢萬後十世稱侯至孫稱王徙都大梁鮑氏謂他國有山川關塞唯梁無之皆以卒戍守按九域志卒戍四方守亭障者參列粟糧庾不下十萬宋都大梁太祖欲西邊洛陽據山河之固曰不出百年民力殫矣後山陳氏謂開封無山川之阻爲四戰之地故太祖以兵爲衛畿內常用十四萬人

長城附

戰國之世各有長城秦昭王築長城以備邊楚有長城又有扞關以拒巴趙肅侯築長城以備邊齊宣王乘山嶺之上築長城東至海西至濟州以備楚燕築長城自造陽至襄平置

上谷漁陽右北平遼東以拒敵魏之長城自惠王築也攷竹書紀年梁惠成王十二年龍賈帥帥築長城於西邊魏世家惠王十九年築長城塞固陽城自鄭濱洛以北有上郡當是時秦數侵魏而西戎義渠稱王窺中國故築長城焉鹽鐵論曰魏濱洛築長城阻山帶河以保晉國

韓都邑

關塞附

韓原

韓世家韓之先與周同姓姓姬氏其後苗裔事晉得封於韓原曰韓武子武子後三世爲韓厥從封姓爲韓氏索隱曰按左傳云邗晉應韓武之穆則韓是武王之子然詩稱韓侯出祖則是有韓而先滅今據此文云其後裔事晉封於韓原曰

韓武子則武子本是韓之後晉又封之於韓原卽今之馮翊縣是也系本云韓萬生賅伯賅伯生定伯簡簡生與與生獻子厥

州

宣子徙居州漢河內州縣括地志懷州武德縣本周司寇蘇忿生之州邑也

平陽

貞子徙居平陽晉州臨汾縣世本云景子徙平陽

鄭

哀侯二年滅鄭因徙都鄭改號曰鄭蘇秦說韓王曰韓北有鞏洛成臯之固西有宜陽常阪之塞東有宛穰洧水南有陘

山地方九百餘里國策頓子曰韓天下之咽喉魏天下之胸
腹玉海云晉楚之霸也爭鄭秦之并六國也始於韓以虎牢
成臯之險也秦拔成臯滎陽十九年而韓亡圖書編云河南
豫州之地平夷洞達九有一轂八面受敵之場也而戰國之
時韓魏以區區之陋邦北縈南齊環繞數千里界於楚秦齊
趙四大國之間無再會不受敵而虎狼之秦搏噬尤亟其勢
可謂危矣而終能雞唱荷戈月沉擊柝繼世相仍爲二百年
之戰國及與齊楚偕亡夫以二百年韓魏之君豈皆賢哉咸
能不失疆土則以生於憂患故耳漢地理志云韓地角亢氏
之分野也韓分晉得南陽郡及潁川之父城定陵襄城潁陽
潁陰長社陽翟郟東接汝南西接宏農得新安宜陽皆韓分

也及詩風陳鄭之國與韓同星分焉鄭國卽今河南之新鄭本高辛氏火正祝融之墟也及成皐滎陽潁川之崇高陽城皆鄭分也周宣王弟友爲周司徒食采於宗周畿內是爲鄭鄭桓公問於史伯曰王室多故何所可以逃死史伯曰四方之國非王母弟甥舅則夷狄不可入也其濟洛河潁之間乎子男之國號會爲大恃勢與險密侈貪冒君若寄帑與賄周亂而敝必將背君君以成周之衆奉辭伐罪亡不克矣公曰南方不可乎對曰夫楚重黎之後也黎爲高辛氏火正昭顯天地以生柔嘉之材姜嬴荆芊實與諸姬代相干也姜伯夷之後也嬴伯益之後也伯夷能禮於神以佐堯伯益能儀百物以佐舜其後皆不失祀而未有興者周衰將起不可偏也

桓公從其言乃東寄帑與賄虢會受之後三年幽王敗桓公死其子武公與平王東遷卒定虢會之地右維左沛食溱洧焉土陋而險山居谷汲男女亟聚會故其俗淫鄭詩曰出其東門有女如雲又曰溱與洧方渙渙兮士與女方秉蘭兮洵訐且樂惟士與女伊其將譖此其風也吳札聞鄭之歌曰美哉其細已甚民弗堪也是其先亡乎自武公後二十三世爲韓所滅韓自武子後七世稱侯六世稱王五世而爲秦所滅秦旣滅韓徙天下不軌之民於南陽故其俗夸奢上氣力好商賈漁獵藏匿難制御也宛西通武關東受江淮一都會也自東井六度至亢六度謂之壽星之次鄭之分野與韓同分

商阪

以下附
西

蘇秦說韓宣惠王曰韓北有鞏洛成臯之固西有宜陽商阪之塞六國表秦孝公十六年城商塞玉海云商阪一作商塞卽商山也在商州商洛縣南一里亦曰楚山武關在焉

成臯

北

困學紀聞云虎牢之險天下之樞也在號曰制在鄭曰虎牢在韓曰成臯鹽鐵論云韓阻宜陽伊闕要成臯太行

燕都邑

附關塞

薊

通釋周武王封召公於北燕都薊輿地廣記武王封帝堯之後於薊又封召公於北燕其後燕國都薊詩補傳曰薊後改爲燕猶唐之爲晉荆之爲楚或曰黃帝之後封於薊者已絕

成王更封召公奭於薊爲燕蘇秦說燕文侯曰燕東有朝鮮
遼東北有林胡樓煩西有雲中九原南有滹沱易水博物志
云燕却背沙漠進臨易水西至君都東至於遼長蛇帶塞儉
陸相乘也鹽鐵論云燕塞碣石絕邪谷繞援遼蘇代見燕王
曰天下戰國七燕處弱焉獨戰則不能有所附則無不重南
附楚楚重西附秦秦重中附韓魏韓魏重韓非子曰燕襄王
以河爲境以薊爲國襲涿方城殘齊中山有燕者重無燕者
輕注方城涿之邑也漢地理志云燕地尾箕分野也武王定殷封召
公於燕其後三十六世與六國俱稱王東有漁陽右北平遼
西遼東西有上谷代郡鴈門南得涿郡之易容城范陽北新
城固安涿縣良鄉新昌及渤海之安次皆燕分也樂浪元菟

亦宜屬焉燕稱王十世秦欲滅六國燕王太子丹遣勇士荆軻西刺秦王不成而誅秦遂舉兵滅燕薊南通齊趙渤海之間一都會也初太子丹賓養勇士不愛後宮美女民化以爲俗至今猶然賓客相過以婦侍宿嫁娶之夕男女無別反以爲榮後稍頗止然終未改其俗愚悍少慮輕薄無威亦有所長敢於急人燕丹遺風也上谷至遼東地廣民希數被外患俗與趙代相類有魚鹽棗栗之饒北鄰烏丸夫餘東賈真番之利元菟樂浪武帝時置皆朝鮮滅貉句驪蠻夷殷道漸衰箕子去之朝鮮教其民以禮義田蠶織作樂浪朝鮮民犯禁八條相殺以當時償殺相傷以穀償相盜者男沒入爲其家奴女子爲婢欲自贖者人五十萬雖免爲民俗猶羞之嫁娶

無所讎是以其民終不相盜無門戶之閉婦人貞信不淫辟其田民飲食以邊豆都邑頗放效吏及內郡賈人往往以杯器食郡初取吏於遼東吏見民無閉藏及賈人往者夜則爲盜俗稍益薄今於犯禁浸多至六十餘條可貴哉仁賢之化也然東夷天性柔順異於三方之外故孔子悼道不行設浮於海欲居九夷有以也夫樂浪海中有倭人分爲百餘國以歲時來獻見云自危四度至斗六度謂之析木之次燕之分也

遼東郡

以下附

匈奴傳燕置遼東郡以備邊通典云舜營州遼水之東是也燕置遼東郡秦漢因之

遼西郡

通典云燕築遼西郡

上谷郡

漁陽郡

右北平郡

天下圖書記云燕築長城又置上谷漁陽右北平遼東以隔中外

朝鮮障

蘇秦曰燕東有朝鮮遼東按朝鮮傳王滿燕人自始燕時嘗略屬真番朝鮮爲置吏築障秦滅燕屬遼東外徼

長城

匈奴傳燕築長城自造陽至襄平置上谷漁陽右北平遼西遼東以別中外冠帶戰國七而三國邊於匈奴燕與戎相接

杜氏通典云北狄以畜牧爲業隨逐水草無文書俗簡易以
言語爲約束然各有分地射獵禽獸食肉衣皮習於攻戰此
天性也唐虞則山戎夏則獯鬻周則獫狁懿王時德衰侵暴
及涇陽人被其苦至曾孫宣王乃命將討伐至太原稱爲中
興其後山戎越燕伐齊後又伐燕齊桓公救燕敗走之襄王
之時戎狄至雒邑東衛境侵盜尤甚晉文公乃興師攘却居
於西河圖洛之間圖音號曰赤翟白翟而晉北有林胡樓煩
之戎燕北有東胡山戎各分散谿谷自爲君長往往而聚者
百有餘戎然不相統一自晉悼公納魏絳之謀和諸戎之後
而晉強至安王之時趙襄子踰句注而破之泊於戰國趙武
靈王築長城其後燕將秦開襲破東胡却地千餘里燕亦築

長城以自固北邊備對云古來築長城以扞北虜者四世燕
趙秦隋也秦制多仍燕趙而隋氏不盡因秦也